

Nkalaŋ ní bwâm míme Yesuε ngáne

Jɔnε

átélé

Ndibned ní kálag

Nkalaŋ ní bwâm ngáne Jɔnε átélé nílúmte aá Yesuε adíi Eyale é Dyöb éche édé á ngíndé ne á ngíndé. Echê Eyale êntim moonyonj édyēē-’ε átíntê e bad. Mmén nkalaŋ, Jɔnε atelé mó ábel bad ábe béléaá mó bédúbe nén bán Yesuε, Mwän a Dyöb mó adé Nsoode awě Dyöb dénhōbpē aá móṣlōm. Anlúméd-ε aá nzé bad bédúbpé mó békūd e’soosonj.

A kálag tē wén á mbooted, Jɔnε alúmte ngáne baahóg béndūbēē Yesuε békwentén-ne áhíd mó, álúmtē-’ε ngáne bémpeē-’ε bétáŋgánnáá mó, béekwentene-’ε mó adúbe. E’ped 13-17 é’hóbe t̄ŋgene abé áde Yesuε ne ábē bembapεε bémbeē pón dé esyáál kááŋ ne epun éche békóbé mó ne mam míme ánlāá’ é bó ene pón dé esyáál. Jɔnε ahóbé ámpē aá nzé mod adúbpé Kr̄stəə ákūd alongé áde déemaá’.

Nkabtéd ní kálag

Ndibned 1.1-18

Jɔnε, Ndusenε ne bembapεε bé’sō ábe Yesuε 1.19-51

Nsón míme Yesuε 2.1-12.50

E’pun bé asóg ábe Yesuε á Jerusalem ne benben ne Jerusalem 13.1-19.42

Mpuu míme Sáŋgwéé ne alúmed áde álúmtáá bad yäl 20.1-31

Nsógten: Yesuε alúmté yäl ámpē á Galilia 21.1-25

Eyale êntim moonyon

¹ A mbooted, byánán Dyöb déhăg nköŋsé Eyale êmmad abé. Eyale émbē ne Dyöb. Echê Eyale ébédéε Dyöb. ² Káŋse á mbooted Eyale émbē hōm ahóg ne Dyöb. ³ Dyöb dêmbenléd échê Eyale âhăg bwēm é'syā̄l. Chōm ké ehóg éesaá éche Dyöb dénhăgké ésebé ne Eyale. ⁴ Alongé ásyā̄l dénhū ne Eyale, ádê alongé dó-'aá apíínédé baányon e'nyínen bé ekíde. ⁵ Abê e'nyínen bé ekíde é'pene' á ehíntén-tê, ehíntén éehēlēē bō abóded.*

⁶ Mod nhóg ampě awē Dyöb dénlōmmē. Dīn démbē mó bán Jone. ⁷ Jone ampě áláa bad tâŋgene ábê e'nyínen bé ekíde, âbel nén bad bésyā̄l béwōg, bédúbe-ε. ⁸ Saké mwēn abédé ábê e'nyínen bé ekíde. Ampě âbíd mbōŋ tâŋgene ábê e'nyínen bé ekíde. ⁹ Eyale chōo ébédé e'nyínen bé ekíde é' mbále ábe é'nyínte' moonyon asyā̄l ekíde. Mó-'aá apagé'áá á nköŋsé-te. ¹⁰ Abédé á nköŋsé-te, boŋ kénéε Dyöb dénhăgké nköŋsé ne mó, nköŋsé ménkênchemmé mó. ¹¹ Ampě áwē dyad boŋ ábē bad bénkênkobpé mó. ¹² Ké nê, ambě donge á bad kunze ábé bán bé Dyöb. Abé bad bēbédéε bad ábe bēnkob mó ne adúbe áde béndūbēē mó. ¹³ Béesaá bán bé Dyöb nyaa echē moonyon áchyáá'ε mwān. Bénkēmbáá bán bé Dyöb byánán moonyon mó achyáá bō. Dyöb dēn dōo áde awâb Titéε.

¹⁴ Eyale êntim moonyon, édyēē átínté echêd. Anlón ne nsimé, anlúmed-te syánē ngáne mbále e Dyöb ékóó abé. Dennyín échē ehúmé, ehúmé éche sáá ábágé mó néε nímē mpom mí mwān. ¹⁵ Jone anhób mam áyā̄l echê, anháád aá, “Anén mod móo

* **1:5** Ehíntén-ne éehēlēē bō abóded káa ehíntén énkênchemmé bō.

ńlángé'áá nyé meé, 'Mod ahúe' ámbid echêm awě atómé me, áyale bédêchyaá me, né adé ámín.' ”
 16 Alón áde álóné ne nsimé ábélé syáā moosyáál dekudé nnam ámbid e nnam. 17 Wéε Moseε dóo Dyöb dêmpoódté mbéndé. Bon nsimé ne mbále béhúú ne Yesu Krístəə. 18 Modmod eényĩnēε Dyöb mbêd, éetóméé nímē mpəm ní mwān awě adé Dyöb abé-'ε mó á akéb. Mwěmpen mó akidényĩn mó. Mó abelé bon Titê Dyöbe abyéen.

*Jone, Ndusene ahóbé ad
 mósad Ane-awě-Béwógté*

(Mat 3.1-12; Mak 1.1-8; Luk 3.1-18)

19 Baámháá bé Israel bé dyad á Jerusalem bénlōm beprise ne bad bémpēe bé túmbé e Levi wéε Jone, bán béke béseded mó bánken nzé-módé ádíí. 20 Enkēmbangé ahób, bon ampanléd bó áte aá, “Saké me ndé Ane-awě-Béwógté.” 21 Héε bésedteé mó bánken, “Nzé-ō édíí? Wε-εé edé Elaijaa?” Ankwentén aá, “Aáy, meésáá mó.” Bēnsedéd mó ámpē bánken, “Wε-εé edé nkal é'dəádəŋ awe bésinéé-yε?” Antimtén bó aá, “Aáy.” 22 Káəŋne á asog dóo bésedteé mó bánken, “Nzé-ō édíí? Láá sé ábel sétim ámbid áláa bad ábe bélómé sé. Nzé-módé wewe ehóbé wéé módé?” 23 Héε Jone átimtanné bó ne e'yale ábe nkal é'dəádəŋ Yesayaa ánhōbpē aá, “Méε ndé ehób éche mod awě ah̄ŋte' á ehyáŋge aá, 'Nyétii nzii eche Sāŋgwéé.' ”

24 Bəəb-pəó Befarisia bóo bénlōm ábê bad ábe bémpē wéε Jone. 25 Bēnsedéd mó ámpē bánken, “Nzé weésē Ane-awě-Béwógté, weésē-'ε Elaijaa káa Nkal é'dəádəŋ awe bésinéé, cheé-ō édušanné bad?”

26 Héε Jone átimtanné bó aá, “Ndusan ne mendib,

boŋ mod adé átíntê echên awě nyéēbii'é. ²⁷ Mó adé ane awě äpě ámbíd echêm. Meékwognedéé áhune ké nímē nkɔɔd mé metámbe.”

²⁸ Mmén mésyāal mēmbeñléd á dyad á Betani á múde mé edíb é Jodan nímíní wéé Jone ádúsánnáá bad.

Yesue, Mwän-a-Ndyɔŋ ní mbód a Dyɔb

²⁹ Néé bīn é'sáŋgé, Jone anyín néé Yesue áhúé'é níní. Héé áhóbéé aá, “Nyénɔne', Mwän-a-Ndyɔŋ ní mbód a Dyɔb mōne. Mó ahúde' mbéb ní bad bé nkɔŋsé. ³⁰ Anén mod móɔ nílángé'aá nyé áde ménhōbpē meé 'Mod äpě ámbíd echêm awě atómé me, áyāle bédêchyaá me, né adé ámīn.' ³¹ Ké mmén menkēmbíí'é mó, boŋ mempeř nídusan bad ne mendíb ábel bad bé Israel bebíí mó.” ³² Héé Jone ábídeé mbóŋ nén aá, “Menyín nēŋgáne Edáádəŋ é Dyɔb ébídeé ádyōb néé élāā, ésud mó á nló mīn, ébé-'e ne mó. ³³ Ké nê, menkēnsóŋténne meé mō ne. Boŋ Dyɔb áde dénlōm me aá nídusan bad ne mendíb dēmmäd me aláa aá, 'Mod awě wényinnē néé edáádəŋ é Dyɔb ésúdeé á nló mīn, boŋ étyéém áhed, móɔdusén bad ne Edáádəŋ éche Esáá.' ³⁴ Nnyíne nímén mekan mésyāal, mbíde-'e mbóŋ nén meé mó adé Mwän a Dyɔb.”

Bembapεε bé'sō ábe Yesue

³⁵ Néé bīn é'sáŋgé ámpē, Jone ambé áhed ne ábē bembapεε bébe. ³⁶ Annyín néé Yesue átóméé. Adě ányíneé mó, anhób aá, “Nyénɔne', Mwän-a-Ndyɔŋ ní mbód a Dyɔb mō ne.” ³⁷ Adě ábē bembapεε bébe béwógé nê, bēmbootéd Yesue ahíd. ³⁸ Ade Yesue ánóné ámbíd boŋ anyín nēŋgáne behídeé mó ansedéd bó aáken, “Cheé nyéhedeé?” Bēntimtén

mó bán, “Rabai” (awě adé bán meléede) “Héé édyε’έ?” ³⁹ Anláá bó aá, “Nyéhyag, nyényín wée ndyεε’έ.” Né-ᵛᵛ, bēnkě anyín wée ádyεε’έ. Ade bépédé áhed ébédé dyam ngóη éniin é ngukél. Bēndyεε-’ε áhed kááη bīn é’híntén bó. ⁴⁰ Atíntê e ábê bembapεε béβε ábe bénwōg dyam áde Jone ánhōbpē boη béhíd-te Yesuε, nhóg abédé dīn bán Andreyá. Andreyá abédéε Simōn Petro mwānyañ. ⁴¹ Né-ᵛᵛ dyam dé’sō, ankě mwānyañ Simōne áhed. Anyíné-’aá mó boη álāngē mó aá, “Sēnyíné Ane-awě-Béwógté” (nédē Krístəə). ⁴² Dóo Andreyá ápééné Simōne wée Yesuε. Yesuε anōné-’aá Simōne chóōη, boη áhōbē aá, “Edii Simōne, mwān awě Jone. Béchəgé wε bᵛᵛ bán Sepase.” (Adén dīn ádii melemlem nēε Petro, nê adé ndim e aláá.)

Yesuε achénlé Filibe bó Nataniél

⁴³ Nēε bīn é’sángé, Yesuε ammad aá mókag á mbwóg e Galilia. Dóo ákíi Filibe atán boη álāngē mó aá, “Hídé με.” ⁴⁴ Filibe abédéε mod a dyad á Betsaida, melemlem mé dyad ádē Andreyá bó Petro bémbídtē. ⁴⁵ Filibe anyín Nataniéle. Héε álāngéé mó nén aá, “Sēnyíné ane mod awě Moseε ántenlé mam áyāl echē áwe mbéndé-te. Móo kááηne bekal-bé-e’dəádəη bēntenlé mam á yāl. Adii Yesuε mod a dyad á Nazaret, mwān awě Josebe.” ⁴⁶ Héε Nataniéle ásedtéé mó aáken, “Dyam á bwām áhéé áhεle ábid á Nazaret?” Dóo Filibe álāngéé mó aá, “Hyě ényín.” ⁴⁷ Ade Yesuε anyíné Nataniéle ahúε’, dóo áhóbéé áyāl echē aá, “Nyénone, mwān a Israel nén sóm-sóm, awě mbeltéd ntyéémé!” ⁴⁸ Héε Nataniéle ásedtéé mó aáken, “Chán émwédé με abíi?” Héε Yesuε ákwεntanné aá, “Filibe adēhób aá móchəge wε, nnyíné wε á alín á ngəl sé.” ⁴⁹ Héε

Nataniελε áhóbεé aá, “A meléed, edíi Mwän a Dyöb. Wε-εé edé kâη e bad bé Israel.” ⁵⁰ Yesue antimtén mó aá, “Edúbpé áyāle rílangé wε mεé nnyíné wε á alín á ngəl sé. Wεényīn mam mímě métómé nén.” ⁵¹ Hée ábádεé aá, “Ne mbále, nlānge nyé nén mεé, nyéēnyīn née dyöb ánédndé nyēnyīn-ne née ángel é Dyöb échágkεé ésudé-’ε Mwän-a-Moonyonj ámīn.”

2

E’wóngé á dyad á Kana

¹ Ambíd e e’pun é’bε, e’wóngé bémbē á dyad á Kana á mbwóg e Galilia. Yesue nyaá ambé áhed. ² Bénlēbē Yesue ne ábē bembapεε bómpē á e’wóngé wê. ³ Mīm mēmmaá áte. Hê dōo Yesue nyaá ápédé áwē boη álāngē mó aá, “Mīm mémáá bó.” ⁴ Hée Yesue álāngεé mó aá, “A-nyan, weetāηgenεé me dyam áde rítāngéné abel aláa. Echem pónde eépédéé.” ⁵ Hée nyaá ákíi bembaledε bé ngande bē aláa aá, “Nyébel kéchéé éche álāngé nyé aá nyébel.” ⁶ Bōōb-pōō, mbeé é meláá ébedé benben ne áhed. Echê ndín é mbeé chōō bad bé Israel bébēnládtáá áhé mendīb áte á nwoβe ní yāl á pónde e mekáne echâb. Ké ehéé etedé’áá dyam mbwókel e líta e mendīb. ⁷ Hée Yesue álāngεé bembaledε bé ngande bē aá, “Nyélóned mbeé chē ne mendīb.” Né-ōō, bénlōnēd échē mbeé hōōd ne mendīb. ⁸ Dōo álāngεé bó aá, “Nyékōbe-ōō mendīb bōōb, nyékεεn wée mod awē alyágte’ mekan mé ncháged.” Né-ōō, bēmbēl áned. ⁹ Ade ane mod áwógléné mímē mendīb míme mémáá mīm atim, enkēmbíí’é wée mébíde, (boη bembaledε ábe bēnkē mímē mendīb akōbe bémbíi). Dōo áchágé mod awē akude sómbé,

¹⁰ boŋ álāngē mó aá, “Mod téé abelé asébe achágtén bad mím nímé mébóó. Bad bémaa-’áa mó amwé bwāmbwam, boŋ ábagé bó nímé mééboo. Boŋ we, etimé ekōŋgé míme mébóó kááŋ ne bōob.” ¹¹ Mmén menyáké nímé Yesue ábélé á Kana á mbwóg e Galilia móó mébédé ábē e’chemléd é’sō. Hē dó-’aá álúmté échē ehúmé, ábē bembapεε bēnsūm-me nímab nlém áwē.

¹² Néε nēn áamáá atóm, Yesue ansyógé á dyad á Kapenahum nchoo ne nyaá, baányan ne ábē bembapεε. Bēndyεé-’ε áwed nguse é e’pun.

*Yesue anané bekáb bé nyoŋgé á Ndáb-e-Dyōb
(Mat 21.12-13; Mak 11.15-17; Luk 19.45-46)*

¹³ Adē pōndé e Ngande e Nnyíme-ámín ékwógé bad bé Israel apε, Yesue ankě á dyad á Jerusalem.

¹⁴ Adē ápédé áwed, ankě á Ndáb-e-Dyōb. Antán néε bad békábεé dyōn. Bésómé-’-’áá nyag, mbód ne mbəŋgé, bepele-bé-mōné-’ε bépēnlé mōné. ¹⁵ Héε átédé nkōod, ámané etaŋgú ánanné bó nchoo ne échab mbód ne nyag á Ndáb-e-Dyōb wē. Ampántéd mōné nímé bad bépēnlé’áá áte, ákūnē-’ε betébele ábe bépēnlé’áá nímé mōné ámín mekuu ámín. ¹⁶ Anláá bad ábe bésómé’áá mbəŋgé aá, “Nyébíden beləə bēn á ebwóg. Nyéētímté ndáb echě echem Sāŋ ndáb e dyōn.” ¹⁷ Adē ábē bembapεε bényíné nē, dōó békámténé eped é kálag e Dyōb éche éhóbe nēn bán “A-Sāŋ, kán echě níwóó áyāle echoŋ ndáb ēwūū me.”

¹⁸ Héε benkamlenε bé bad bé Israel bétímé ámbíd, bésēdté mó bánken, “E’chemléd é’héé ehle elúmed sé ábel sébíi bán ewóó kunze ábel enén ndín e dyam?” ¹⁹ Yesue antímtén bó aá, “Nyépāŋ enén Ndáb-e-Dyōb, mēlōŋ chó ámpē áyāle e’pun

é'láán.” ²⁰ Dóo ábê bad béhóbeé bánken, “Enén ndáb echě bétédé móom mé mwě méniin ne mwě ntóób chóo éhóbeé wéé móōlōn áyāle e'pun é'láán-ε?” ²¹ Bon ndáb echě Yesue áhóbe'áá ebédéé dásō eche yāl. ²² Né-ōó ámbīd eche Yesue áwédé bon Dyōb ápūūd mó, dóo ábē bembapεε békámténé dyam ádē ánlāā'é bó. Béndübē mam nímě méténlédé á kálag e Dyōb, bédúbé-'ε e'yale ábe Yesue ánhōbpē.

Yesue abii mod asyáál nlém áte

²³ A pónde e Ngande e Nnyíme-ámīn, áde Yesue ámbēē á dyad á Jerusalem, bad híin béndübē mó ngáne bényinnē menyáké nímě ábeléé. ²⁴ Bon ké nē, Yesue enkēsummé nlém áwāb, áyāle ambíi moosyáál áte. ²⁵ Modmod enkētāngénné mó dyam aláa tāngene mod ampée áyāle mwēn ammad moonyon asyáál nlém abii áte.

3

Yesue bó Nikodemuse

¹ Mod nhóg abédé bán Nikodemuse. Abédéé nhóg awě alyágté'áá bad bé Israel abé-'ε epepé é bad bé Farisia. ² Mbwe nhóg ampě wéε Yesue nkuu, álāngē mó aá, “A-meléed, sêchemé nén bán, edii meléede awě Dyōb álómé. Áyāle nzé Dyōb déesě ne mod, eéhēlēē-se ábelé mekan mé menyáké nímě ébeléé.” ³ Yesue ankwentén mó aá, “Ne mbále, modmod eéhēlēē-se asól á nkamlēn ní Dyōb ésebán achyáádté ámpē.” ⁴ Nikodemuse-'ε ansédéd mó aáken, “Chán mod awě amaá akwog áhele se achyáád ekóólé-ekóólé? Eesaá mbále nén bán eéhēlēē-se asól á abum ádē nyaá ngen échě

élónténé ébe âbel béchyáa mó ámpē-ye?” ⁵ Dóo Yesue átimtanné mó aá, “Ne mbále, nlânge we meé, nzé béēchyáa mod ne mendíb ne Edáádəŋ éēhēlēē-se asól á nkamlən rí Dyöb. ⁶ Ane awě achyáádté ne moonyon a ekob, adíí moonyon. Awě mó-’ε achyáádté ne Edáádəŋ é Dyöb adíí Edáádəŋ. ⁷ Weebág menyáké ngáne ríhóbé meé ‘Mod atánǵéné achyáád ekóólé.’ ⁸ Nzé epub éhóbé bán chó étóme’, pəd echě édíá ake chóó ékagké. Ewóge’ ntəgag míme ébeléé bon weebíé’ε wée ébídeé ké’ε wée ékagké. Melemlem nê dóo édíí ne mod ké ahée awě achyáádté ne Edáádəŋ é Dyöb.” ⁹ Héε Nikodemuse ásedtéé mó aáken, “Chán nén áhēlese ábenled?” ¹⁰ Yesue ankwentén mó aá, “Née édíí meléede ambáá a bad bé Israel weéhēlé’ nímén mekan asóŋten-ne? ¹¹ Ne mbále, nlânge we meé, dyam áde sébíí dóo séhóbéé. Sébíide-ε mbón ne dyam áde sényíné. Bon nyé modmod nyéēkwenteneé chöm éche séhóbéé adúbe. ¹² Née rílánǵéé nyé mekan míme médé mekan mé nkōŋsé, nyéedúbpe, chán-nō nyémwée adúbe nzé nlánǵéé nyé mekan nímě médé mekan me nkon mí mín? ¹³ Modmod eékí’ε á nkon mí mín étōméé Mwān-a-Moonyon awě abídeé áwed bon ápe á nkōŋsé.” ¹⁴ Ngáne Mosεε âmboméé nyă á akon* bon atíí dó ámín á ehyánge, melemlem nê dóo bétíí’ε Mwān-a-Moonyon. ¹⁵ Nén débenléd âbel bon kénzée awě adúbpé mó ákud alongé áde déemaá’.

¹⁶ Dyöb átómténé bad bé nkōŋsé adəŋ. Né-ó anlóm nímē mpəm mí Mwān âbel kénzée awě

* **3:14** Nyă eche Mosεε âmboméé ebédée nyă eché âmbenlé. Nê dóo Dyöb démbenlé áhood bad ábe nyă énlēdté á ehyánge. Nzé bad bēnnān ene nyă, bédyēē bwām. Nəm 21.9.

adúbpé mós eewág bon ákud alongé áde déemaá'.
¹⁷ Dyöb dénkênlómme awe Mwän á nköhsé ákáad bad. Alongé á bad dós ánlómme mós áson. ¹⁸ Kénzéé awě adúbpé mós eékwaá nkáásé, bon kénzéé awě eedúbpe mós, amaá nkáásé akwe áyāle eedúbpeé mpom ní Mwän ní Dyöb. ¹⁹ Nén dós mbakú e Dyöb édíí: E'nyínen bé ekíde é'pédé á nköhsé, bon baányon bédáá ehíntén tómaa e'nyínen bé ekíde áyāle nímbāb mbeltéd níde mbéb. ²⁰ Kénzéé awě abele mbéb, akós ábē e'nyínen bé ekíde, éepaá-'aá á e'nyínen bé ekíde-tē ábān nén nímbē mbeltéd mé mbéb méēbídē áwed. ²¹ Bon kénzéé awě abele mam mé mbāle, abíde' á e'nyínen bé ekíde ábel nén bad bényín bán kéchéé échē ábeléé awógne Dyöb.

Mbón echē Jone tñgene Yesue

²² Ambíd e nē, Yesue ne ábē bembapēe bēnkē á mbwóg e Judeya. Bóbō bēndyēé áwed nguse é e'pun, ádusán-ne bad. ²³ Jone mómpē adusánáá bad á dyad á Anon benben ne á dyad á Salim áyāle mendíb mémbē áhed bwāmbwam. Bad békágé'áá áwē, ádusán-ne bó. ²⁴ Nén ábédé byánán béhē Jone á mbwog. ²⁵ Bōob-pós, donje dé bembapēe ábe Jone bépéntánnáá ne mod a Israel tñgene nwobe ní yāl. ²⁶ Dós bépédé wēe Jone bon bēlāngē mós bán, "A-meléed, ekamtan mod awě nyúmō nyēbédé á pēd e edíb é Jodan eníníí? Mod awě éhóbé'áá mam á yāl echē. Nóné'! Mós adusan bad níníí! Bad híin békagke áwē." ²⁷ Jone ankwentén aá, "Modmod eéhēlēē-se ákud chöm, ésebán Dyöb ábágé mós chó. ²⁸ Nyébēn nyédé me mbón nén bán menhób méé saké me ndé Ane-awě-Béwógté.

Dyöb dénlōm με á'sō âbonŋsen bad áyāle επε éche Ane-awě-Béwógté. ²⁹ Mod awě akude sómbé mōo awóó sómbé. Bon nsón-a-echoŋ a mod awě akude sómbé, awě atyéeme mō á nkəg áwōglān mō, abāg menyiŋge nzé awóge mō ehób. Né-óó, nén dōo ákəá bon nlón ne menyiŋge. ³⁰ Edúbé échē étāŋgéné née échágkεé, échēm-me ésude'."

Ane awě abidé ádyōb atómé moosyáál

³¹ Ane awě abidé ádyōb atómé moosyáál. Ane awě mō'-ε achyáádté á nkōŋsé adii mod a nkōŋsé, áhōbē-ε mam mé nkōŋsé, bon ane awě abidé ádyōb adé ámīn e moosyáál. ³² Chōm éche ányíné ne éche áwógé chōo áhōbεé bon ké nê, modmod eedúbpéé mō. ³³ Bon kénzée awě akobé chōm échē áhōbé, né akwεnténé ne nlém rīsyāāl aá Dyōb ádé mbále. ³⁴ Póle e Dyōb chōo mod awě Dyōb álómé áhōbεé áyāle Dyōb déenənée ámbid nzé abage' mod échē Edəádəŋ. ³⁵ Titée adəá awe Mwān, abagé-ε mekan mésyāāl áwē mekáá. ³⁶ Kénzée awě asumé nlém wée ane Mwān, akudé alonǵé ádē déemaá'. Bon kénzée awě eébéł' ngáne áhōbé éekudté alonǵé áde déemaá', ábē akud nkógsen rī Dyōb.

4

Yesue ne mmwáád a Samaria

¹ Yesue ambíi aá Befarisia béwógé nén bán mókude ekud é bembapεε tómaa ne Jone, módusan-ne bó. ² (Kénée Yesue mwēn éedusannaá bad, ábē bembapεε bóo bédúsánnáá bad). ³ Awóg áde Befarisia bēnwōgkē nê dēmbēł Yesue anhidé á mbwóg e Judeya átim ámbid á mbwóg e Galilia.

⁴ Byánán äpe á Galilia antónghén née áπόό a mbwóg e Samaria. ⁵ A mbwóg e Samaria wê ampě á dyad áde béchəgέέ bán Sika. Adén dyad démbē benben ne ndəəb echě Jakəbe ámbéé mwān Josebe se e'boəd. ⁶ Ayāle ene ndəəb echóg éche bélimé éche bébwélé'áá mendíb áte émbē áhed. Echén echóg é mendíb ébéδέε éche Jakəbe. Ngáne eke énkōmēdtē Yesue andyεέ á nkəg mé échē echóg é mendíb. Nén ábéde dyam-εε áde kəd.

⁷ Héε mmwaád a Samaria nhóg áhyédé mendíb abwel. Yesue anláá mó aá, “Hé me mwā mendíb mé amwé.” ⁸ Enén pónde Yesue ábē bembapεε bēnkě á dyad-tē áchan ndyéed. ⁹ Héε ane mmwaád átímtanné mó aá “Ebé mod a Israel, me-’ε mbé mmwaád a Samaria, échōmē me mendíb-ε?” (áyāle bad bé Israel ne bad bé Samaria béechemtannaá.) ¹⁰ Héε Yesue ákwentanné mó aá, “Nzé wembíí mende mé Dyōb, ebíí-’ε mod awě ahedne we mendíb, né ehědné me mendíb. Né mbagé-’ε we mendíb míme mébage alongé.” ¹¹ Ane mmwaád ankwentén mó aá, “A-Sán, ké chōm éche bébwēnléé mendíb weewóó’ε, echóg é mendíb-pe échábé ásē, héε wētēdtē míme mendíb míme mébage alongé. ¹² Echəd sáá ambáá Jakəbe mōnlyágnéd sé échén echóg é mendíb. Mwēn, ábē bán ne ábē e'lém é'syāāl, hén-εé bémwágé'áá mendíb. Nédē ehóbe boəb wéé mótōmē Jakəbe-ye.” ¹³ Yesue ankwentén aá, “Kéznéé awě amwéde mímén mendíb, píđ ēbē ekób mó. ¹⁴ Boη kénzéé awě āmwē mendíb míme mébéé mó píđ éekóbpé mó mbéd. Mendíb míme mébéé mó, mébē mó áte née n'yélé míme méēlēnē'. Mmē mendíb mébě mó alongé áde déemaá'.” ¹⁵ Héε ane mmwaád álāngéé

mó aá, “A-Sán, beé me nímê mendíb âbel nén píd eekóbé mémpē, meépāg-ke hén âbwel mendíb âmpē.”

¹⁶ Dóo Yesue álângeé mó aá, “Käg, éke échag awon nchóm, bon étim ámbíd hén.” ¹⁷ Ane mmwaád antimtén Yesue aá, “Mewóó’é nchóm.” ¹⁸ Dóo Yesue áhóbéé aá, “Ekalé mbále wée móowóó’é nchóm. Ayāle ekéwōn bechóm bétāan, ké ane mod-te awē nyúmō nyêdé bōob eésaá awon nchóm. Dyam áde éhóbé áde mbále.” ¹⁹ Awóg áde ane mmwaád áwógé nê dóo álângeé Yesue aá, “A-Sán, nnyíne nén meé edii nkal é’dáádān. ²⁰ A mbōod-mín hén dóo ábēd besáá bébágé’áá Dyōb edúbé, bon nyé bad bé Israel nyéhóbe bán á Jerusalem dóo bétāngéné Dyōb edúbé abe.” ²¹ Héε Yesue álângeé mó aá, “Á-mmwaád nén, sōntén chōm éche nlangeé we. Póndé ehúe’ echē nyéebaá Titée edúbé á mbōod-mín hén ké’ε á Jerusalem. ²² Nyé bad bé Samaria nyébage chōm éche nyéebíi’é edúbé. Bon sé bad bé Israel sēbage mó edúbé ngáne sébii mó áyāle nén e’soosōn é’húú dásō ne bad bé Israel. ²³ Bon póndé ehúe’, emaa’-ε ne ape, echē bad ábe bébage Titée edúbé ne nlém nhóg bébéé mó échē edúbé á Edáádān ne á mbále-tē. Echē ndín é bad chōo Titée áhedeé aá bébage mó edúbé. ²⁴ Dyōb ádii Edáádān, bad-te ábe bébage mó edúbé bétāngéné mó chó abe á Edáádān ne á mbále-tē.” ²⁵ Héε ane mmwaád álângeé Yesue aá, “Mbii meé Ane-awē-Béwógté āpě. Póndé echē ápeé, ātānlēd sé mekan mésyāāl áte.” ²⁶ Héε Yesue álângeé mó aá, “Me awē sóo dekale’ me-éé ndé mó.”

²⁷ Ene póndé chēn dóo ábē bembapεε bépédé. Yāl enkóm bó áte ányín née ákanléé mmwaád.

Boη bó modmod eésedteé mó aáken, “Cheé éhedéé?” Ké-’ε “Cheé nyé ane mmwaád nyékaléé?”
 28 Ane mmwaád antedé apom dé mendíb, átim ámbíd á dyad-tê, áke aláá bad aá, 29 “Nyéhyag, nyényín mod awě alánge me mam mésyā́l míme ríkémberlé. Nyé bán, saké Ane-awě-Béwógté awě bésinéé nén-ε?” 30 Dóó ábê bad behídté á dyad-tê áke dé atán Yesue.

31 Ene pónde, bembapεε ábe Yesue bécháá’áá mó bán, “A-meléed dyé ndyééd.” 32 Boη Yesue ankwentén bó aá, “Nwóó ndyééd e adyé echě nyéēbii’é.” 33 Héε ábē bembapεε bésedteé nhóg ne aníní bánken, “mod múmó apiínédé mó ndyééd-ε?” 34 Dóó Yesue álangeé bó aá, “Echem ndyééd edii ábel nsón míme mod awě alómé me, áhóbé aá mbel, ámad-ε mó. 35 Ngómē nyéyǒgké ahób bán ámbíd e ngǒn éniin, né pónde e mbote epedé? Nyénone’, nlange nyé nén méε nyékéled díd áte, nyényín ngáne mbote é máá mbonśén abé, ápád á nzag-tê. 36 Ké bǒǒb mod awě apáde adé míme nsábe akud, alade mbote é alongé áde déemaá’, ábel nén mod awě awéne bó mod awě apáde bó moosyā́l bébê menyinge. 37 Né-ǒǒ ngan echě békaléé nén bán, ‘mod nhóg awénéé, aníní-’ε ahúd edé mbále.’ 38 Me-εé nlómé nyé mbote áke dé apád éche nyéēwénéé. Bad bémpēe bébélé nsón, nyé-’ε nyétombwan bó nsón.”

Bad bé Samaria hiin bédúbpe

39 Bad bé Samaria hiin ábe bémbíd ádé dyad béndübē Yesue áyā́le mam míme ane mmwaád ánlā́’é bó. Ane mmwaád anláá bó aá, “Alánge me mekan mésyā́l míme ríkémberlé.” 40 Né-ǒǒ,

áde bad bé Samaria bépédé áwē, bēnchāḡ mó bán ádyεε áwāb dyad. Né-ᶇó, andyεé áwed e'pun é'βε. ⁴¹ Bad híin bémpēe bēndūbē mó áyāle áde ayáge. ⁴² Bēnlāā ane mmwaád bán, “Saké dyam áde élāḡgē sé dēmpen dóo ákǎá boḡ sēdúbé Yesuε, boḡ sébēn sēwógné etúu, sēbíí-ε bán mwēn-εé akōḡté Nsoode a nkōḡsé abé.”

*Yesuε achōḡté mwǎn
a mod ambáá a ḡómenaa*

⁴³ Ambíd e e'pun é'βε Yesuε anhidé á mbwóg e Samaria, áke á mbwóg e Galilia. ⁴⁴ Yesuε mwēn anhób aá, nkal é'dǎádəḡ eewóó'é edúbé áwē dyad. ⁴⁵ Ade ápédé á mbwóg e Galilia, bad bēnkob mó. Bēnkob mó áyāle bēmbē á Ngande e Nnyíme ámīn á Jerusalem, bényín-ne mam mésyāēl míme ámbenlé.

⁴⁶ Héε Yesuε átímé ámbíd á Kana, wéε ântimédte mendíb mīm. Ahed-te dóo mod ambáá a ḡómenaa ábédé awē mwǎn ákónlé'áá á dyad á Kapenahum. ⁴⁷ Ade ane mod áwógé bán Yesuε ábídé á mbwóg e Judeya apedé á mbwóg e Galilia, ampě áwē, achāḡ mó aá áchood mwǎn, awē ambé benben ne kwééd. ⁴⁸ Yesuε anláá mó aá, “Nyé modmod nyéedúbpéé kǎəḡ né nyēnyíne e'chemléd ne menyáké.” ⁴⁹ Ane mod ambáá a ḡómenaa anláá mó aá, “A-Sáj, hyǎḡ, dékag kwééd edé ehób bán chó ekóbe awem mwǎn.” ⁵⁰ Yesuε antimtén mó aá, “Kǎḡ, awoḡ mwǎn ǎbē á alonḡé.” Ane mod andúbé e'yale ábe Yesuε, ákē-ε. ⁵¹ Ade ane mod ádíí adé á nzii e esú dóo ábē bembəlede bēbómne mó, boḡ bēlāḡgē mó bán, “awoḡ mwǎn ǎbē á alonḡé.” ⁵² Dóo ásédte bó pónde eché ane mwǎn âmbootédte bwām abé.

Bénlāā mó bán, “Ahéb dētēdē mó chän á ngəŋ póg.”⁵³ Dóo ane mod ákámtnéné aá nímē melemem mé póndé móo Yesue ánlāā’é mó aá, “Awoŋ mwän äbē á alongé.” Né-óó, bóobe eche ndáb béndübē Yesue.

⁵⁴ Abén e’chemléd bóo bémbē e’chemléd ábe é’lonténé é’be ábe Yesue ámbenlé áde ábíde á mbwóg e Judeya boŋ ápē á mbwóg e Galilia.

5

Yesue achōŋté eped é mod

¹ Ambíd e nímén mésyāāl, Yesue ankě á Jerusalem á ngande e bad bé Israel. ² A Jerusalem wê, benben ne Nsəl mé E’ké mé Ndyoŋ ní mbód, etoŋ ébédé áhed. Echén etoŋ béchágé’áá chó á ehób é bad bé Israel bán Betzata. Enwōŋ mebépé métáan. ³ A mebépé-te wê, bad bé nkole bénkūmēn áhed, ábe békwédé ndím, ábe bédé e’ped é’ bad ne ábe béwédé eped.* ⁵ Mod nhóg abédé áhed awě akékolé á etūn é móom mé mwě méláán ne mwě waam. ⁶ Ade Yesue ápedé áhed annyín ngáne ane mod ánángé ásē, abíí-ε aá nkole nímémé mó á yəl. Dóo ásédte mó aáken, “Edəó bwām adyεε-yε?” ⁷ Ane mod antimtén mó aá, “A-sán, meewóó’é mod awe äsōlēd me á etoŋ-tē nzé mendíb mépuútédé áte. Nlédte ahób meðé nsól, né mod ampée amaá asól.” ⁸ Dóo Yesue álāŋgéé mó

* **5:3** Doŋge á kálag ábádé nchoo 3b-4: Abé bad bé nkole bémbē áhed ásin bán mendíb mépuuted áte. 4 Ebédé nén bán, pónde-té ángel eche Sāngwéé ehyagáá asud á etoŋ-tē wê épuuted chó áte. Nzé émbenléd-te né, mod a nkole ké ahéé awě ansébé asól áwēd-te nkole nímáá’áá mó.

aá, “Syə́á ásē, étêd échon ebúm, ékag.” ⁹ Abwōg-ábwōg ane mod andyě bwâm, ányāg échē ebúm áte, ábootéd-te akε.

Epun éche nén dēmbēnlédte ébédéε á mbwε-mé-nkóme-áte. ¹⁰ Né-ɔ́, anyín áde bad bémháá bé Israel bényíné ane mod awě Yesuε ándidte bwâm, bēnsédéd mó bánken, “Chii adé mbwε-mé-nkóme-áte, nzé dehídé-’ε mbéndé echêd, weetāngeneé ebúm apém se ébwāgne’.” ¹¹ Boη ankwentén aá, “Mod awě adidé mε bwâm anláá mε aá, ‘Téd échon ebúm, ékag?’ ” ¹² Héε bésédteé mó bán, “Nzé adé ane mod awě álāngé wε aá, étêd échon ebúm ékag?” ¹³ Boη ane mod mwēn enkēnkongé Yesuε abíi, ngáne Yesuε ámmadté asól á amute-tê áde démbē áhed. ¹⁴ Ambíd enê Yesuε annyín ane mod á Ndáb-e-Dyöb. Ade ányíné mó, anláá mó aá, “Nɔ́né’, emáá bwâm adyεε. Weébēlē mbéb ámpē ésebé nê, né wětōm atag ngáne étágé’áá nê.” ¹⁵ Hê dɔ́ ane mod áhídté, boη ákε álāngē bad bémháá bé Israel aá Yesuε móɔ adidé mó bwâm. ¹⁶ Né-ɔ́, bad bémháá bé Israel bēmbootéd Yesuε mekuu ahíd áyāle achōnté mod á mbwε-mé-nkóme-áte. ¹⁷ Yesuε antimtén bó aá, “Echem Sáη ayōgké nsón abel, mε-’ε ámpē ntāngéné nsón abel.” ¹⁸ Enén póle échē Yesuε ánhōbpē, emběl yāl ennabé bad bé Israel atod áte áwúu mó, áyāle saké mbéndé e mbwε-mé-nkóme-áte, chēmpen ábóo boη achəgé Dyöb aá Sáá, nédē alúmtē’ aá bó Dyöb bétáá.

Ngine e Mwän a Dyöb ehúú ne Dyöb

¹⁹ Né-ɔ́, Yesuε antimtén ábē bad bémháá bé Israel aá, “Á mbále, nlānge nyé nén mεé, Mwän a Dyöb eébēlēε dyam ké ahóg ne mó mwēn.

Mekan níme anyíneé Sáá abele' mósó mómpe ábeleé. Kéchéé éche Sáá ábeleé chósó mómpe ábeleé. ²⁰ Ngáne édíí nén bán Sáá adáo Mwän, alümte mósó chóm téé éche ábeleé. Alüméd-te mósó ndale é mekan éche étómé nímén, ábel ékómed nyé yál áte. ²¹ Ngáne Sáá ápuudteé bad bon ábage-'ε bó alongé, melemlem nê dósó Mwän mómpe ábageé alongé wée kenzéé awě adáo alongé abε. ²² Melemlem-'áá Sáá éékāadtē modmod. Abagé Mwän ngine esyā́l ákáad bad. ²³ Abelé nê ábel bon bébage Mwän edúbé melemlem ngáne bébageé Sáá. Kenzéé awě eébage Mwän edúbé, né eébageé ké Sáá awě alómé Mwän edúbé. ²⁴ Ne mbále, nlänge nyé nén mée, kenzéé awě awógé ábêm e'yale bon adúbé mod awě alómé mε, akudé alongé áde déemaá', béekáad-taá mósó. Amaá atóm á kwééd, asólé á alongé. ²⁵ Ne mbále, nlänge nyé mée, pónde ehúé', emaa-'ε apε, echě bad ábe béwédé béwōgkē ehób e Mwän a Dyōb, bad ábe béwōg-kε chósó bébē á alongé. ²⁶ Ngáne alongé áhúú ne Sáá, melemlem nê dósó ábélé áá alongé áhúú ne Mwän ámpē. ²⁷ Abagé-'ε Mwän ngine ákáad bad áyā́le Mwän adíi ane awě béchəgεé bán Mwän-a-Moonyon. ²⁸ Nén déékōmtē nyé yál áte; pónde ehúé' echě bad bésyā́l ábe béwédé béwōgkē échē ehób, ²⁹ bébíd-te á son-tē: Bad ábe bébélé mbon, bépuú ábē á alongé, ábe bó-'ε bébélé mbéb bépuú békud nkógsen.

Mbón áyāl wée Yesue

³⁰ “Dyamdyam déesaá áde níhele níbēl ne mmén. Ngáne echem Sáj álángé mε áá níkáad nê dósó níkáadtéé, né-ósó mbakú echēm etyéémé. Etyéémé

áyāle meekáádtéé ngáne mmēn rídáá, boŋ nkáadte' ngáne mod awě alómé me áhedéé.

31 “Nzé mbíde echem yǎl mbóŋ né ene mbóŋ echě mbídeé eékobnedéé. 32 Boŋ mod ampée adé awě abíde me mbóŋ, mbíí-'ε nén meé, mbóŋ echě ábídeé me eköbnédé. 33 Nyênlóm bad wée Jone, mó-aá abíde mbóŋ t̄ŋgene mbále. 34 Eesaá nén bán, moonyoŋ at̄ŋgéné me mbóŋ abíd. Boŋ nlángé nyé t̄ŋgene mbóŋ eche Jone, ábel nyédúbe me, nyékud e'sósoŋ. 35 Jone abédéé née etrukán éche échodne', épenté-'ε ekíde. Nyêmbé menyin̄ge áhíd ábê e'nyínen bé ekíde áyāle esóŋ é pónde. 36 Boŋ nwóó mbóŋ echě etómé ké mbóŋ echě Jone ámbídtē. Nsón níme echem Sáj ábágé me aá mbel nímad, mmēn mbíde mbóŋ nén bán echem Sáj móó alómé me. 37 Echem Sáj awě alómé me mwēn ámpē abíde me mbóŋ. Nyéewógéé mó ehób, nyéenyíné-'aá mó mbéd. 38 Nyéedúbpeé ane awě alómé, né-óó nyéemwagké bán échē eyale édyεε nyé á nlém-tē. 39 Nyêkíde' Eyale é Dyöb ahed áte áyāle nyêwēmtan bán nyééküd alongé áde déemaá' áwēd-te. Echén Eyale chēn-éé ehóbe áyāl echēm. 40 Ké nê, nyéehédēē ape áwēm ábel boŋ nyékud alongé áde déemaá'.

41 “Saké edúbé é baányoŋ níhedéé. 42 Boŋ mbíí nyaa é bad éche nyédíí, mbíí-'ε meé nyéewōŋné Dyöb edaŋge á nlém-tē. 43 Mpedé á d̄ŋn áde echem Sáj, nyéekobéé me, boŋ nzé mod ampée apedé á d̄ŋn ádē dēn, nyéékob mó. 44 Nzé nyékene' nhóg ne aníníí, nyéwōgē bwám, boŋ nyéēbēlēē ngáne Dyöb dēn dékenné nyé. Chán-nō nyédúbēē me? 45 Ké née nyéekobéé me, nyéewém tán bán, me-éé mēlāā

echem Sáŋ meé nyéēkobee me. Mosē awē nyélyágé nlem áwē mwēn-neé akōŋté ane abé awē áhōb aá, nyébelé mbéb. ⁴⁶ Nzé nyēnkōŋ Mosē adúbe né nyédúbpé me, áyāle nēn, áyāl echēm dōo ántenlé mam míme átélé. ⁴⁷ Boŋ nēe nyédúbpéé mekan míme átélé, chán nyédūbēē ábēm e'yale?"

6

Yesue adíté ndun e mod

(Mat 14.13-21; Mak 6.30-44; Luk 9.10-17)

¹ Ambíd e nímén mésyāāl, Yesue ne ábē bembarēe bēnchabé edib é Galilia éche béchagēé bán edib é Tiberia. ² Ndun e mod ehídé'áá mó áyāle bényíné'áá menyáké míme ábélé'áá ngáne áchóŋté'áá bad bé nkole. ³ Héee Yesue ne ábē bembarēe békíí á ekone-mín boŋ bédyēē ásē. ⁴ Póndé e Ngande e Nnyíme-ámín e bad bé Israel embé benben. ⁵ Asad áde Yesue ásádé dīd annyín ngáne ndun e mod éhúé'é mó benben. Dōo ásedtéé Filibe aáken, "Héee déchanné ndyééd echē débēé ábén bad ádyé?" ⁶ Ansédéd mó nê ákæg mó áyāle mwēn ammad abii chōm éche ábenlé. ⁷ Filibe ankwentén aá, "Etēd tómaa ne mbwókél é kábpe ébe áchan ndyééd éche ékwognéd ábén bad bésyāāl adyé ábel boŋ mod téé ádyē mwātiíd." ⁸ Dōo Yesue awē mbarēe ampée, Andreyā, Simōn Petro mwānyā áhóbēé aá, ⁹ "Mwā kódemod adé hén awē awánlé e'wle é'taan ábe bēbénlé ngun é báli, awánlé'ē súu ébe, boŋ chán enén ndyééd éheléé-se ékwōg enén ndun e mod?" ¹⁰ Dōo Yesue álāngēé ábe bembarēe aá, "Nyéláa ábē bad, bédyēe ásē." Nkōákō ambud abé á pēd e ádé abwóg a hōm. Né-ōó, ábē bad bésyāāl bēndyēé ásē. A amute-tē wē, baachóm

bébédé dyam e'kálé é'taan. ¹¹ Héε Yesuε átédé ábē e'wεle, ásāgnān Dyōb, boη ábē bembapεε békabpé bad. Ambēl melemlem ne éché súu. Mod-téé andyé ngáne áhédé'áá. ¹² Ade bó moosyáól bémáá akód, Yesuε anláá ábē bembapεε aá, “Nyélad ndyééd echě elyāgé ásē. Ndyééd ké póg eebébé'.” ¹³ Né-óó, áde bémáá adyé bēnlād ndyééd echě enlyāg ásē, enlón e'lón dyōm ne é'βε. ¹⁴ Anyín áde ábē bad bényíné nímén menyáké níme Yesuε ábélé bēnhōb bán “Ne mbále, nkal e'dáádəη awě bēnhōbpē bán āpē á nkōηsé mó nén.” ¹⁵ Yesuε ambíí aá béhεde mó akób ányáged mó ábé kēη. Né-óó, antīm ámbíd á ekone-mín.

*Yesuε akii á mendib mín
(Mat 14.22-33; Mak 6.45-52)*

¹⁶ Ngukél, bembapεε ábe Yesuε bēnkě á edib. ¹⁷ Bēnsól á bōle-tē, béchabpé edib, bétimnád á Kapenahum. Ehíntén ēmmād apε áde Yesuε éēpédéé wée bédíí. ¹⁸ Enén pónde epub é ngíne étómé'áá, épúutád-te mendib áte. ¹⁹ Bōob-póó bembapεε bēmmād akε ké máyl méláán ké'ε méniin, dōó bényíné Yesuε akag á mendib mín, átimnád benben ne ábab bōle. Mbwóg ní ngíne ménkōb bó. ²⁰ Boη anláá bó aá, “Mε-εé ndé, nyéebáá'.” ²¹ Héε bétédé mó á bōle-tē ne menyīnge, ábwōg-ábwōg bēpēēn-ne bōle á nkin wée békágé'áá.

Yesuε mó adé ewεle éche ébage' alongé

²² Néε bīn é'sángé, ndun e mod echě enlyāg á múde mé edib mímíníí wée Yesuε ne ábē bembapεε bēmbīdtē, bēnchem bán, ngukél echě entóm, bōle e'hóg bēnpεn bóó bēmbē áhed. Bēmbīí-ε bán Yesuε enkēnsónlé áwēd-te ne ábē bembapεε. Bēmbīí

bán ábē bembapεε bēnpεn bóo bēnkĕ. ²³ Myĭle mēmpēe míme mémbíd á dyad á Tiberia mēmpĕ á nkin mé edib bēnbēn ne hōm áde ene ndun e mod éndyĕĕ e'wεle ámbíd echĕ Sánḡwĕé áamá Dyōb aságnεn. ²⁴ Ade ene ndun e mod ényíné nén bán, Yesuε ne ábē bembapεε béesaá áhed, bénsōl á myĭle-tĕ wĕ, békĕ á Kapenahum, áke dé ahed Yesuε.

²⁵ Ade ábē bad bépédé á pεd e edib eníní, bényīn Yesuε. Bēnsēdéd mó bán, “A-meléed, pónde ehéé épédé hén?” ²⁶ Yesuε ankwentén bó aá, “Ne mbále, nlānge nyé nén mēé, saké menyáké míme mbéle níkáá boḡ nyéhédé me. Nyēhede me áyāle e'wεle ábe nyédyéde boḡ nyĕkód-te. ²⁷ Nyéewág ntŭ áyāle ndyééd echĕ ebōode', boḡ nyéwág ntŭ áyāle ndyééd echĕ ebág abé ne abé á alongé áde déemaá', chó-'aá ebage alongé áde déemaá'. Ene ndyééd chóo Mwán-a-Moonyoḡ ábéé. Móo Dyōb Titée áhédé e'chem aá ábel nĕ.” ²⁸ Dóo ábē bad bēnsēdéd Yesuε bánken, “Cheé sétāngéné abel, ábel boḡ sébel mekan míme Dyōb áhedéé aá, sébel?” ²⁹ Yesuε ankwentén aá, “Dyam áde Dyōb áhedéé aá nyébel ádíi ádúbe me awĕ álómé.” ³⁰ Bēntimtén Yesuε bán, “Menyáké méhéé wébenlé míme sényīnnē boḡ sédúbé wε. Cheé mmōn wékoḡgé abel? ³¹ Abēd betaa bēndyĕ mána á ehyānge ngáne éténlédé á kálag e Dyōb nén bán, ‘Ambag bó e'wεle ábe é'bidé ádyōb aá bédyĕ.’ ” ³² Yesuε anhób aá, “Ne mbále, nlānge nyé nén mēé, saké Moseε móombĕ nyé ewεle éche ehúú ádyōb, boḡ echem Sánḡ móombĕ nyé ewεle éche ehúú ádyōb. ³³ Ayāle me-éé ndé échĕ ewεle éche Dyōb ábágé, échĕ ehúú ádyōb, echĕ ábageé baányoḡ bé

nkõjsé alongé áde déemaá’.”

³⁴ Dóo belângeé Yesue bán, “A-Sán, bagé sé échén ewele pónde ésyāāl.” ³⁵ Yesue anláá bó aá, “Me-éé ndé ewele éche ébage alongé áde déemaá’. Kénzéé awě apedé áwêm, nzaa éekóbpé mós ámpē. Kénzéé awě adúbpé me, píd éekóbpé mós ámpē. ³⁶ Nlânge nyé nén meé nyényíné me bon nyéedúbpéé me. ³⁷ Bad bésyāāl ábe echem Sán ábágé me, bépě áwêm. Kénzéé awě apedé áwêm, meebánge mós akob. ³⁸ Ayāle meebídeé ádyōb ábel ngáne ébōhnedé me. Mpedé ábel ngáne ébōhnedé echem Sán awě alómé me. ³⁹ Bon nén ádíi mewēmten nime ane awě alómé me, aá átinté bad bésyāāl ábe ábágé me, meebódé ké nhóg, bon aá npuud bó moosyāāl á epun é asóg. ⁴⁰ Echem Sán ahede aá moosyāāl awě anyíné mwān, adúbé-’e mós, ákud alongé áde déemaá’. Měpuúd-te bó á epun é asóg.”

⁴¹ Abé bad bé Israel bēmbotéd anyoo áte tñgene Yesue, ahób áde áhóbé aá, “Meé ndé ewele éche ébídé ádyōb.” ⁴² Hê dóo behóbéé bánken, “Saá Yesue, mwān awě Josebe nén-e? Ngómē debíí sáá ne nyan? Chán-nō áhelese áhōbē aá móbídē ádyōb?” ⁴³ Yesue anláá bó aá, “Nyésōg anyoo áte. ⁴⁴ Modmod éehēlēē-se ápe áwêm, ésebán Titée awě alómé me apééné mós áwêm. Měpuúd-te mós á epun é asóg. ⁴⁵ Eténlédé ngáne bekal bé’dáodəñ behóbé nén bán ‘Dyōb déyāgēd bó moosyāāl.’ Kénzéé awě awóge’, áyāgkē-’e wée Titée, apag áwêm. ⁴⁶ Eesaá nén bán, mod ké nhóg akényin Titée. Ane awě abídé wée Dyōb mwēmpen móo akényin Titée. ⁴⁷ Ne mbále, nlânge nyé nén meé, kénzéé awě adúbpé me ákūd alongé áde déemaá’. ⁴⁸ Me-éé ndé ewele

éche ébage alongé. ⁴⁹ Abēn betaa bēndyē mána á ehýáŋge, boŋ ké nê, bēnwē. ⁵⁰ Boŋ ewele éche ébídé ádyōb édé nyaa echê kénzée awě adyédé ch́ó éewáá. ⁵¹ Mε-εé ndé ewele éche ébage alongé éche ébídé ádyōb. Kénzée awě adyédé échê ewele, ábē á alongé á ngíndé ne á ngíndé. Echén ewele éche mébεé nyé édií echem yǎl echê mébē ábel boŋ ríkade alongé dé nkōŋsé.”

⁵² Ade ábē bad bēwógé nê, bēnlīŋ, bēn ne bēn bébootéd-τε mpentεν ní ngíne, bésεdté bánken, “Chán anén mod áhεle atéd eche yǎl, áβε syánē aá dédyág?” ⁵³ Yesuε anláá bó aá, “Ne mbále, nlāŋge nyé nén mée, nzé nyéedyéde yǎl e Mwān-a-Moonyoŋ nyēmwe-’ε nímē mekií, nyéekudté alongé áde déemaá’.” ⁵⁴ Kénzée awě adyédé echem yǎl, amwé-’ε nímēm mekií, ákūd alongé áde déemaá’, mēpuúd-τε mó á epun é asóg. ⁵⁵ Ayāle echem yǎl ch́ô ekōŋté ndyééd abé, nímēm mekií-’ε mékoŋ mmítéd abé. ⁵⁶ Kénzée awě adyédé echem yǎl, amwé-’ε nímēm mekií, alyagé adé ne mε, mε-’ε nlyagé ndé ne mó. ⁵⁷ Titée awě akāā boŋ bad bēbé á alongé, mó alómé mε, mó akāā-’ε boŋ mbé á alongé. Melemlem née kénzée awě adyédé echem yǎl, mébenlé abé á alongé. ⁵⁸ Né-ǎó, mε-εé ndé ewele eche ébídé ádyōb. Meésáá nēŋgáne ewele éche ábēn betaa bēndyēē, boŋ ké nê bēwé. Boŋ kénzée awě ádyē echem yǎl ábē á alongé á ngíndé ne ngíndé.”

⁵⁹ Yesuε anhób nímén mésyāāl áde áyágté’áá á ndáb e mekáne e bad bé Israel á Kapenahum.

E’yale ábe Yesuε é’pεene’ alongé áde déemaá’

⁶⁰ Ade bad híin ábe béhídé'áá Yesue béwógé mímén mekan bénhōb bán, “Adén ayáge álélé ahíd. Nzéé ahēle ákob ene ndín e dyam?” ⁶¹ Yesue ambíí aá, bényonje áte áyāl echē, né-ǎó anláá bó aá, “Nê áwag nyé á yǎl-ε? ⁶² Chán-nō nyéhōbpē áde nyényinnē Mwǎn-a-Moonyon apumme' ámbíd ámín wée ámbídtē! ⁶³ Edǎádǎn é Dyōb chōó ébage' alongé. Ekob é yǎl éesaá dyamdyam. E'yale ábe nílángé nyé é'díi edǎádǎn ne alongé. ⁶⁴ Bon ké nê, nyé donje á bad nyéedúbpēé.” (Bootya á pónde éche Yesue ábóótédé ayáged, ambíí bad ábe béedúbé, abíí-'ε mod awě äsōm mó.) ⁶⁵ Ambád ahób aá, “Nén dōó ákǎó bon nláá nyé meé modmod eéhēlē-εe ápe awēm kǎñ né echem Sǎñ abelé bon ápē áwēm.”

⁶⁶ Bootya ene pónde nê dēnkñ bad ábe béhídé'áá Yesue bésóg mó ahíd, bétim-me ámbíd. ⁶⁷ Héε Yesue ásedtēé ábē bembapēε dyōm ne bébe aá, “Nyémpē nyéhēde atim ámbíd-ε?” ⁶⁸ Simōn Petro ankwentén mó aá, “A-Sǎñ, wée nzéé sékéé? Wε-εé ewóó e'yale ábe é'kǎθ' bon mod ákūd alongé áde déemaá'. ⁶⁹ Sédúbpé sēbíí-'ε bán, wε-εé edé Ane-awě-Asáá awě abidé wée Dyōb.” ⁷⁰ Héε Yesue ákwentanné bó aá, “Eesaá mbále bán mpwεdé nyé bad dyōm ne bébe-yε? Bon ké nê, nyé mod nhóg adii mod a Satan.” ⁷¹ Judasε, mwǎn a Simōn Iskariōde móo Yesue áhóbé'áá. Kénēε ámbēē mbapēε nhóg átintē e bembapēε dyōm ne bébe, mó ankē Yesue ntúrē.

7

Yesue ne badnyan

1 Ambid e nímén mésyāāl, Yesue akagé'áá mebwóg ne mebwóg á mbwóg e Galilia. Enkëndəngé ake á mbwóg e Judeya áyāle bad bé Israel béhéde'áá mó awúu. 2 Βααβ-ρσός, Ngande e E'bem * e bad bé Israel embé benben. 3 Héε Yesue baányanη bélanγεέ mó bán, “Etəngéné áden abwóg á hōm ahide, éke á mbwóg e Judeya ábel bad ábe béhíde we bényín menyáké míme ébeléé. 4 Mod eéβēlēē nsón á e'konéd-te, nzé ahede áá móbyéen. Ngáne ébeléé nímén mekan mésyāāl ébel nkōnsé řsyāāl míbii we.” 5 (Ké Yesue baányanη bėnkėndúbéé mó.) 6 Héε Yesue álanγεέ bó áá, “Echem pøndé eépédéé. Boη ne nyé, echen pøndé edé pøndé ésyāāl. 7 Nkōnsé méehelée-se řkōō nyé. Boη řkōō me áyāle mpanlad bó nímāb mewusé áte. 8 Nyébó nyékag á ngande. Méekaá áwed áyāle echem pøndé eépédéé.” 9 Yesue amaá'-áá ahób nê, abé abé á Galilia.

Yesue akii Ngande e E'bem á Jerusalem

10 Ambid e pøndé áde Yesue baányanη bémáá ake á Ngande e E'bem, mómpē ankě áwed. Boη enkėnlúmédte yāl. Ankě nyaa echě bad bėnkėmbíí'ė ndín e mod echě ádíí. 11 Benkamlenε bé Israel béhéde'áá mó á ngande-tê, bėsėdté bánken, “Héé múmó ádíí?” 12 Atíntê e ndun e mod echě embé á ngande-tê wê, donje á bad béhóbé'áá bán, “Adii mod a bwám,” ábíníí'-ε bán, “Aáy, adoge bad dogén.” 13 Boη bó modmod bėnkėmbídėdté yāl áwed áyāle bėbáá'áá bad bėmbáá bé Israel.

* 7:2 Ngande e E'bem: ebédée ngande echě bad bé Israel bėbėlé'áá ákamten pøndé echě ábāb betaa bėdyée'áá á e'bem-tê áde bėbėdé á ehyanje, áde bėhídté á Egipto.

14 Ade ngande ékwógé apε áfíntê, Yesue ankě asól á Ndáb-e-Dyöb, ábootéd ayáged. 15 Yǎl enkóm benkamlεε áte bwâmbwam tâηgene ádē ayáge. Né-óó, bēnsεδéd bánken, “Chán anén mod ámwédé mímén mam mésyā́l abii áde éekii’έ á esukéλε é mbéndé?” 16 Héε Yesue ákwεntanné bó aá, “Ayáged áde ní’yágtεέ déesaá ádēm. Adii áde mod awě alómé mε. 17 Kénzée awě awémténé abel ngáne Dyöb áhεdεέ, äbī́ kέ ádēm ayáge ahúú ne Dyöb ké’ε ahúú ne mmén. 18 Kénzée awě ahóbne echě kunze, abεle nê áhεde eche yǎl edúbé. Boη mod awě ahεdte’ mod awě alómé mó edúbé, asáá nlém á abum, eesaá mod a metóm. 19 Eesaá mbále nén bán, Mosεε abagé nyé mbéndé-yε? Ké nê, nyé modmod eehídée mbéndé éched. Cheé ékáá boη nyéhεdé mε awúú?” 20 Dóó ene ndun e mod ékwεntanné mó bán, “Edæádεη é mbéb édé wε áte. Benzébádé béhεde wε awúú?” 21 Yesue ankwεntén bó aá, “Nsón nhóg míme mbélé, nkómté nyé moosyā́l yǎl áte. 22 Mosεε ambě nyé mbéndé aá, nyéyage áben bán (kénée édíí bán, saké Mosεε móómbbootéd. Abēn betaa bóó bēmbbootéd). Né-óó, nyéyage bad á Mbwε-mé-nkóme-áte. 23 Nzé béyáge mod á mbwε-mé-nkóme-áte, âbel béēbōō’ mbéndé e Mosεε, cheé ékáá boη nyéliηné mε áyāle nídíde mod bwām á mbwε-mé-nkóme-áte. 24 Nyéekáádté dyam áde mbélé ngáne nyényíné, nyékáad ngáne éhεdnadté.”

Bán Yesue mâdé Ane awě bésiné-yε?

25 Héε dóó donje á bad bé Jerusalem béhóbεé bánken, “Saá mod awě béhεdεέ awúú mô nén-ε? 26 Nyénóné’, akanle bad á tâl e ékwée, bad bémbáá béesaá-’aá mó dyamdyam aláa. Kapóg

bébíí bán ne mbále, môdé Ane-awě-Béwógté-yōō!
²⁷ Boη éheleéé-se ébé nê, áyāle debíí bán pónde echě Ane-awě-Béwógté ápeé, modmod éebíí'ě wée ábídé. Debíí wée anén mod ábídé.” ²⁸ Yesue ambé áyāgtē' á Ndáb-e-Dyōb. Ade áyāgtēé dōo áchāgté ehób ámīn aá, “Eε, nyēbíí me bwām, nyēbíí-ε wée mbídé. Meépedeé hén ne mměn. Ane awě alomé me adé mbále. Nyéebíí'ě mó, ²⁹ boη me pen mbíí mó áyāle áwē dōo mbídé, mó-'aá alomé me.”
³⁰ Ade áhóbé nê, béhédé'áá mó akób, boη modmod enkēmbánné mó ké ekáá á yāl, áyāle eche pónde enkēmpaá. ³¹ Ké nê bad híin átínté ene ndun e mod béndübē mó. Béhóbé'áá bánken, “Ade Ane-awě-Béwógté ápeé, ābēl e'chemléd bé menyáké, míme ítómé míme anén mod ábélé-yε?”

Befarisia bélomé bad akób Yesue

³² Befarisia bēnwōg née bad bényonγεé áte, béhóbéé mímén mekan tēηεne Yesue. Né-ōó bōobe beprise bēmbáá bēnlōm bembalede akób mó. ³³ Héε Yesue áhóbéé aá, “Ndíi ndé ne nyé, boη mwāmpīn ní pónde mēsū ámbíd wée ane awě alomé me. ³⁴ Ambíd enê, nyéēhēd me, boη nyéenyínné, wée mébēē-ε nyéehenlé ape áhed.”
³⁵ Nê dēmbēl benkamleε bésēdté nhóg ne aníní bánken, “Héé anén mod múmó áhedéé ake, wée syánē déehenlé mó anyín? Ahede ake á alon á Grikia wée ábēd bad bédíí á ebwóg áyāged bad bé Grikia-yε? ³⁶ Ahóbe' aá deéhēd mó boη déenyínné mó. Aá déehenlé-ε ape wée móbēē. Cheé nê álūmtéé?”

E'dib bé mendib mé alongé áde déemaá'

³⁷ Epun é asóg é ngande éche éntōmtēn etógnén abé áyāle ene ngande émpě. Yesue antyéém ámīn, dǒǒ áchágté ehób ámīn, áhōbē aá, “kénzée awě píd ékóbé áhyag áwēm áhye ámwê mendíb. ³⁸ Kénzée awě adúbpé me, Kálag e Dyōb ehóbe aá, ‘e’díb bé mendíb mé alongé bēbīdē mó áte é’sobpe.’ ” ³⁹ Edǎǎdǎǎj éche Esáá chǒǒ Yesue áhóbé’áá. Chǒǒ bad ábe béndūbē mó béntǎǎǎǎǎǎ akud. Ene pǒndé né Edǎǎdǎǎj éche Esáá éépēdēē wée ábē bad áyāle ene pǒndé ne Dyōb déélūmtēē ehúmé éche Yesue.

Bad békábné áte á atón áde Yesue

⁴⁰ Donje á bad átíntē ene ndun e mod ábe bēnwōg née Yesue áhóbéé nímén mekan bēnhōb bán, “Ne mbále, anén mod adíi nkal é’dǎǎdǎǎj awě ápě.” ⁴¹ Bad bémpeē bēhóbé’áá bán, “Mǎdé Ane-awě-Béwǒgté awě ápě.” Ké nê, bémpeē bēhóbé’áá bán, “Ane-awě-Béwǒgté eéhēlēē-se abíd á Galilia. ⁴² Eténlédé á Kálag e Dyōb nén bán, Ane-awě-Béwǒgté ábíd á túmbé e Dabid á dyad á Betelhem wée Dabide ámbīdtē.” ⁴³ Né-ǒǒ, bad bēnkabén áte á atón áde Yesue. ⁴⁴ Donje á bad bēhédé’áá mó akób boǎ modmod enkēmbánné mó ké ekáá á yǎl.

Baámháá bé Israel béekwenteneé Yesue adúbe

⁴⁵ Kǎǎǎǎǎǎe ásǒǒǒǒ bembǎledē bé Ndáb-e-Dyōb bēntīm wée beprise bémháá ne Befarisia. Héē beprise bémháá ne Befarisia bésēdtēé bó bánken, “Cheé ékǎá boǎ nyépepeene mó hén?” ⁴⁶ Héē ábē bembǎledē bēhóbéé bán, “Modmod eéhóbéé ndín é mam éche anén mod áhóbéé.” ⁴⁷ Dǒǒ Befarisia bésēdtēé bó bánken, “Nédē ane mod adogé kǎǎǎǎǎǎe nyémpē-yē? ⁴⁸ Nyékényīn née mod ambáá ké’ē

Farisia nhóg adúbpé mô? Ké nhóg eedúbpéé mó. ⁴⁹ Enén ndun e mod eebí'è mbéndé e Mose. Né-òó ebómán édé ne bó." ⁵⁰ Farisia nhóg awě béchágé'áá bán Nikodemuse awě ansébé Yesue akε dé anyín, anláá bó aá, ⁵¹ "Eche syánē mbéndé eébagεé kunze nén dékógsen mod áde déekáadtεé mó, áwóglen dyam áde ábélé." ⁵² Ade áhóbé nê, bēntimtén mó bánken, "We ámpē ebídé á Galilia-yε? Hěd áte á Kálag e Dyòb, wěnyín nén wě nkal é'dáəðəŋ eebídéé á Galilia."

Mmwaád awě akábé asón

⁵³ Ambíd enê moosyáál ansú áwe ndáb.

8

¹ Yesue pen ankě á Ekone é Menzab. ² Néε bīn é'sángé mbwεmbwε, antīm ámbíd á Ndáb-e-Dyòb. Ndun e mod empě áwē. Andyεé ásē ábootéd bó ayáged. ³ Bemeléede bé mbéndé ne Befarisia bēmpεén mmwaád nhóg áwē, awě békóbé néε ákábéé asón á ndáb e e'wóngé. Béntī ane mmwaád átīntē echáb, ⁴ boŋ bēlāŋgē Yesue bán, "A-meléed, békóbé anén mmwaád néε ákábéé asón á ndáb e e'wóngé. ⁵ Á mbéndé eche syánē, Moseε anhób aá, enén ndín e mmwaád bēlūm chó meláá káəŋ áwē, chán-nō wε-'ε éhóbé?" ⁶ Bēnsedéd mó nê áhíí mó melám, ábél nén békóben mó awusé. Boŋ Yesue anwúlén ásē, ábootéd bwēm atel á ndəəb-tē ne ábē e'mii. ⁷ Ade bēbádnéné mó aseded, antíí yǎl ámīn, aláá bó aá, "Nyé ké ahéé awě eébélé mbéb ábē mod a'só álúm mó meláá." ⁸ Anwúlén mó ásē ámpē átelé' ábē bwēm á ndəəb-tē. ⁹ Ade ábē bad bēwógé nê bēmbootéd ahide nhógē-nhógē. Bad bēmbáá bóə bēnsēbē akε, boŋ bésad bēhídē'. Káəŋ

ne á asóg Yesue mwěmpen anlyǎg, ane mmwaád-te abé atyéém áhed. ¹⁰ Ade Yesue átíídé yǎl ámín, dǒo ásedtée ane mmwaád aá, “A-mmwaád nén, héé bad ábe bépééné wε hén bédíí? Modmod eélyagée hén awě ahóbé aá béwúu wε-yε?” ¹¹ Ane mmwaád ankwentén aá, “A Sán modmod.” Héé Yesue álângeé mó aá, “Né mǎmpē méehóbpé meé béwúu wε. Kǎg wε, bon weébēlē mbéb ámpē.”*

Yesue mǎdē e’nyínen bé ekide bé nkõjsé

¹² Yesue anláá ábē bad ámpē aá, “Mée ndé e’nyínen bé ekide é’ bad bé nkõjsé. Kénzée awě ahíde me, éekaá á ehíntén-té, bon ákũd e’nyínen bé ekide ábe é’bage’ alongé.” ¹³ Dǒo Befarisia bélângeé mó bán, “Ebíde echon yǎl mbón, né-óó mbón echon eékobnedéé.” ¹⁴ Yesue ankwentén aá, “Kénee mměn mbíídéé echem yǎl mbón, echem mbón edé mbále, áyāle mbíí wée mbíídé, mbíí-’ε wée nkagké, bon nyé, nyéebíí’ε wée mbíídé, nyéebíí-’áa wée nkagké. ¹⁵ Nyékáadte bad á nyaa e moonyon. Meekáádtée modmod. ¹⁶ Ké menkáádt-te ké káádtén, echēm mbakú edé mbále, áyāle meekáádtée ne mměn, bon nkáadte, ne ane awě alómé me. ¹⁷ Néε behúde ké nê áte, á mbéndé echên, éténlédé nén bán nzé bad bébe bébídé dyam mbón, bon behóbé melelem mé dyam, né ene mbón edé mbón e mbále. ¹⁸ Nyéebíí-óó nén bán nwóó mbón ébe, mměn ne mod awě alómé me, awě adé echem Sán.” ¹⁹ Héé dǒo Befarisia bésedtée mó bán, “Hée sóo ádíí?” Ankwentén bó aá, “Nyéebíí’ε me, nyéebíí-’áa ké echem Sán. Nzé nyémbíí me, né nyéebíí káñne echem Sán.”

* **8:11** Ekud e kálag é’só éewóó’é échén eped (7.53-8.11).

²⁰ Yesue anhób ábén e'yale áde áyágtéé á Ndáb-e-Dyöb-te, bēnben ne wée bēkongéé mōné. Bon modmod enkēnkóbpé mó, áyāle eche pōndé echē bēkóbéé mó enkēmpaá.

²¹ Yesue anláá ábē bad ámpē aá, “Měkě, nzé mmaá-'e akε, nyéēhěd me, bon nyéenyínné, né-ó nyéēwē áwēn mbéb-te. Wée mébēē, nyéehēnlé apε áhed.” ²² Héε bad bēmbáá bé Israel bésēdtéé bán, “Ahóbe' aá, wée mókéé aá syánē déehēnlé apε áhed, múmó ahede yāl awúu-yε?” ²³ Anláá bó aá, “Nyēdíi bad ábe bēbídé ásē wén, bon me pen, mbídé ámín. Nyēbídé á nkōhsé wén, me pen, meebídéé á nkōhsé wén.” ²⁴ Nē dōó ákáá bon ílāngē nyé méé, “Nyéēwē áwēn mbéb-te. Nzé nyéedúbpe bán, 'Ndíi Mod Awē Ndíi,' né nyéēwē-'e áwēn mbéb-te.” ²⁵ Héε bésēdtéé mó bánken, “Nzé-módé édíi?” Dōó ákwētanné bó aá, “Nyaa e mod echē ílāngé nyé se á mbooted méé ndé chōó ídíi.” ²⁶ Nwóó mam híin ahób tēngene nyé, ne ákáad nyé. Bon mod awē alómé me adíi mod a mbále, mekan nímě ílāngé-'áa nyé hén á nkōhsé médíi mekan nímě íwógé áwē.” ²⁷ Ade Yesue áhóbé nē, bēnkēnsónténné bán Sáá awē adé ámín móó áhóbéé. ²⁸ Héε Yesue álāngéé bó aá, “Pōndé echē nyémadté Mwān-a-Moonyon abane ámín, dōó nyébíi' é bán, 'Ndé mod awē íhóbé méé ndé.' Nyébíi-'e bán, meébēlēē dyamyam ne kunze echēm, bon dyam áde íhóbéé adíi dyam áde echem Sān áyágté me. ²⁹ Ane awē alómé me, adé-'e ne me, eétdéé mmēmpen, áyāle mbele' mekan nímě mébóhénéde mó.” ³⁰ Bad híin ábe bēnwōg nēé Yesue áhóbéé nímén mekan, bēndūbē mó.

Nzéé adé sád awē bad bé Israel?

31 Hée Yesue álângeé bad bé Israel ábe béndübē mó aá, “Nzé nyédii nyéhíde’ ádēm ayáge, né nyékõhté ábēm bembapεε abé. 32 Né nyéεbñi mbále, né ene mbále éhūd-te nyé á mehan-tê.” 33 Bēnkwentén bán, “Sédii nchyaátén míme Abrahamε. Séébédéé-’áa ntân a mod mbêd. Chán-nō éhεle éhōbē wεé séebáá á mehan-tê?” 34 Yesue ankwentén bó aá, “Ne mbále, nlânge nyé meé, kénzée awé abele mbéb adii ntân a mbéb. 35 Ntân eebágkε á túmbé-te abé ne abé, bon mwän a túmbé, adii mwän a túmbé pónde ésyāäl. 36 Né-óó, nzé Mwän ahúde nyé á mehan-tê, né dyamdyam déetédte nyé ntân ámpē. 37 Mbíi meé nyédii nchyaátén míme Abrahamε, bon ké nê, nyéhεde me awúu, áyāle nyééhēdēē ádēm ayáge ahíd. 38 Nlânge nyé mekan míme echem Sán álúmté me. Nyé-’ε nyébele mekan míme echen sán álángé nyé.”

39 Bēnkwentén mó bán, “Abrahamε adii eched sán.” Yesue anláá bó aá, “Nzé nyénkõh bán ábe Abrahamε abé, né nyébele’ mekan míme Abrahamε ábélé’áa. 40 Mekan mésyāäl míme ríkembenlé rídii áláa nyé mbále echē íwógé wεε Dyõb. Kénê, nyéhεde me awúu. Abrahamε eébele’áa, enén ndín e dyam. 41 Nyébele mekan míme echen sán ábeléé.” Bēnkwentén mó bán, “Dyõb dēmpen-εé séwóó née eched Sán, béēchyáa-’áa sé á asón.” 42 Dóó Yesue álângeé bó aá, “Nzé Dyõb dēnkõh echen Sán abé, né nyédáó me, áyāle mbídé wεε Dyõb ndé-’ε hén bōob. Meépedεé ne mmēn, bon mó alómé me. 43 Nzom echē ekáó bon nyééhēdē’ me ehób awóg, edii nyééhēdēē ábēm e’yale awóg. 44 Nyédii bán ábe echen sán, Satane, míme mewēmten

mó-'aá nyédáá ahíd. Se á mbooted, adii ane awě awúe' bad, eékwógnédéé mbále mbéd, áyāle mbále eésaá mó áte. Nzé akale metóm, né abele nime nsón áyāle adii nkal a metóm, abé-'e sáá a metóm. ⁴⁵ Nyéedúbpéé me, áyāle nkanle nyé mbále. ⁴⁶ Nyé ahéé ahele alúméd aá, mbelé mbéb? Nzé nkanle nyé mbále, cheé-ᵑ ékóá boḡ nyéedúbpé me? ⁴⁷ Kénzée awě ahúú ne Dyōb, awóge eyale é Dyōb. Nzom echě ekáá boḡ nyéewóglán edii, nyéesaá bān bé Dyōb.”

Bad bé Israel béekobéé ayáge áde Yesue

⁴⁸ Héé ábē bad bé Israel bétimtanné Yesue bánken, “Eesaá mbále bān, sēnkāl mbále áde séhóbé bān, edii mod a Samaria, edáádəḡ é mbéb édé-'e wε áte-yε?” ⁴⁹ Ankwentén bó aá, “Edáádəḡ é mbéb eésaá me áte. Mbage echem Sáḡ edúbé, boḡ nyépeḡ nyéēbāgēē me edúbé. ⁵⁰ Mmēn meéhēdtē yāl edúbé, boḡ mod adé awě aheḡe' aá níkud edúbé, mó-'aá, abage mbakú echě etāḡgéné. ⁵¹ Ne mbále, nlāḡge nyé meé, kénzée awě abele' chōm-éé ní'yágtéé, éewáá mbéd.” ⁵² Dóó ábē bad belāḡgēé mó bān, “Bóob dóó sébíí bān, edáádəḡ é mbéb édé wε áte. Abrahamε anwé, bekal bé'dáádəḡ bómpē bēnwē. Boḡ bóob éhōbē wεé mod awě adúbpé wε, éewáá mbéd. ⁵³ Echēd sáḡ Abrahamε anwé. Ewémtné wεé mótmē mó-yε? Bekal-bé-e'dáádəḡ bómpē bēnwē. Nzé-módé wεwε éwēmtanné wεé módé?” ⁵⁴ Héé Yesue ákwentanné bó aá, “Nzé nhēdte echem yāl edúbé, né échē edúbé éesaá dyamdyam. Echem Sáḡ awě nyéhóbéé bān mó adé nyé sáá, mó abage me edúbé. ⁵⁵ Nyéēbī' é mó mbéd, boḡ mbíí mó. Nzé nhóbé meé meebī' é mó,

né ndé nkal a metóm née nyé. Bon mbíí mó, mbele-
'ε mam míme áhóbéé. ⁵⁶ Echen sáη Abrahamε
ambé menyinge aá, mónyin epun éche mépéé, an-
nyin-ne chó, abé-'ε menyinge bwámbwam.” ⁵⁷ Dóo
bésedtée mó bán, “Ade wéepēdēē móom mé mwé
métáan, wεé mónyinē Abrahamε-ye?” ⁵⁸ Yesue
ankwentén bó aá, “Ne mbále, nláηge nyé nén meé,
byánán béchyāā Abrahamε, ‘Ndé.’” ⁵⁹ Ade ábē bad
béwógé nê, dóo bébóótédé meláá ahεd, álúm mó.
Bon Yesue ansóm, abíd-te á Ndáb-e-Dyöb.

9

Yesue achöηté mod awě béchyááné ndím

¹ Ade Yesue átóméé, dóo ányiné mod awě
béchyááné ndím. ² Dóo ábē bembapεε básedtée
mó bán, “A-meléed, mbéb míme nzéeé ríkáá bon
béchyáá anén mod ne ndím? Mbéb míme mwën-ε,
káa míme sáá bó nyanη?” ³ Yesue ankwentén bó
aá, “Saké míme mbéb ríkáá, saá-kaá míme sáá bó
nyanη. Bon nén ábénlédé ábel ngine e Dyöb ébíd
áwed áwē yäl. ⁴ Ngáne bīn é'díi ényinneé ámin,
detáηgéné débel nsón míme ane awě álómé me.
Ehíntén ékwógé apε áde mod éehenlé nsón ábel.
⁵ Bóob áde rídíi á nköηsé, me-εé ndé e'nyinen bé
ekide bé nköηsé.” ⁶ Ade Yesue amáá ahób nê,
ansob aléed á ndóob, atób dó bon áwögtē ane mod
a ndím á mīd, ⁷ álāηgē mó aá, “Käg, éwobe e'só á
eton é Silom” (ádê dīn ádé nén bán, “Bélómé”).
Né-óó, ane mod ankě, áwöbē-'ε mīd. Antīm ámbíd,
ányinne'.

⁸ Héé bad ábe bémbīi mó ne bad ábe bényináá
ngáne áchóméé bwēm, básedtée bán, “Saá anén

mod ayǒgké adyεε ásē, áchōmē bwēm-ε?” ⁹ Donje dénhōb bán, “Môdé,” ábíníí-’ε bán, “Aáy! Awágne mó wágnén.” Boη ane mod mwēn anhób aá, “Mmēn-εé ndé.” ¹⁰ Dóo bésεdteé mó bán, “Chán-nō émwédé abooted dé anyínεn?” ¹¹ Ankwεntén bó aá, “Mod awě béchəgεé bán, Yesuε, antób eləob, awógéd me chό á mǐd, aláá-’ε me aá ríke á etoη é Silom, ríke ríwobe mǐd. Né-óó, menkě. Awobe áde ríwóbpé mǐd, ríbootéd-tε anyínεn.” ¹² Bēnsεdéd mó bán, “Héé ane mod adíí?” Ankwεntén bó aá, “Meebíí’ε.”

*Befarisia béhéde áte ngáne
Yesuε áchóηté mod a ndím*

¹³ Bēnkεén ane mod awě ankwě ndím wée Befarisia. ¹⁴ Epun éche Yesuε ántōbpé eləob ánēdē-’ε ane mod mǐd áte, ébédeε Mbwe-mé-nkóme-áte. ¹⁵ Befarisia bēnsεdéd ane mod awě ankwě ndím ámpē bánken, “Chán émwédé abootéd dé anyínεn.” Héε álāηgεé bó aá, “Antób eləob awógéd me á mǐd. Ade ríwóbpé e’só, ríbootéd-tε anyínεn.” ¹⁶ Hē dóo donje á Befarisia béhóbεé nén bán, “Anén mod awě abelé ádén dyam, eéhēlēε-se abé mod awě Dyōb álómé, áyāle eékoηgεé mbéndé e Mbwe-mé-nkóme-áte.” Boη ábíníí-’ε béhóbé’áá bánken, “Chán mod a mbéb áheleεε ábelé’ échén ndín e menyáké?” Nén dēmpεén nkabén áfinté echáb. ¹⁷ Né-óó, Befarisia bēnsεdéd ane mod ámpē bánken, “Ngáne éhóbé wεé mōbelé boη ényínne’, cheé éwóó ahób á yāl eché?” Héε ane mod ákwεntanné bó aá, “Adíi nkal é’dáədəη.”

¹⁸ Ké nē, bad bé Israel bēnkéndúbéé bán, ane mod ansébé ndím akwε. Nē dēmbēl bēnchēlé sáá bó nyan. ¹⁹ Bēnsεdéd bó bánken, “Nyéε nyēchyáá

anén mod awě nyéhóbé bán, béchyáá ne ndím-ε? Chán-nō ébénlédé bon anyinnē bɔɔb?” ²⁰ Dɔɔ sáá bó nyan békwentanné bán, “Sébíí bán awɛd mwän mōdé, sébíí-’ε bán bénchyāā mó ne ndím. ²¹ Bon séékoo’é abii ngáne ámwédé anyínen, séebii-’áa mod awě abelé bon anyinne’. Nyésɛdte mó, eésáá mwëndem, mwën áhâb.” ²² Bénhōb nê áyāle bébáá’áá bad bé Israel. Bad bé Israel bénhōb bán, kénzée awě adúbpé áá Yesue mōdé Ane-awě-Béwógté, bėnan mó á ndáb e mekáne. ²³ Nê dɔɔ dēnkəŋ bon sáá bó nyan béhób bán, “Nyésɛdte mó, eésáá mwëndem, mwën áhâb.”

²⁴ Héε ábē bad bé Israel béchēnléé ane mod awě Yesue ándidté bwám ngen éché élónténé ébε, bon bélāngē mó bán, “Kál echoŋ mbále á dīn á Dyōb. Sébíí bán anén mod awě achōŋté wε adii mod a mbéb.” ²⁵ Dɔɔ ane mod átímtanné bó áá, “Meebíí’ε mε ké adé mod a mbéb ké’ε eésáá. Dyam ahóg áde mbíí, áde nén, menkwě ndím bon bɔɔb nnyinne’.” ²⁶ Héε bésɛdteé mó bánken, “Cheé ámbenlé bon ébootéd anyínen?” ²⁷ Ankwentén bó áá, “Mmaá nyé aláa bon kénê, nyéedúbpée mε. Cheé nyéhɛdɛé bán rílaa nyé ámpē? Nyémpē nyéhɛde’ ábē bembapεε abé-yε?” ²⁸ Héε bésyáá’é mó, béhōbē bán, “Wε-éé edé mbapεε awě ane mod. Sédii bembapεε ábe Moseε. ²⁹ Sébíí bán, Dyōb dénhōb wée Moseε, bon séebii’ε wée anén mod pen ábídé.” ³⁰ Ane mod ankwentén áá, “Nén adé nkâmten ní yāl áte. Nyéebii’ε wée ábídé, bon kénê abelé nnyinne’.” ³¹ Debíí bán, Dyōb déekwentánné mekáne mé bad bé mbéb, bon akwentan mekáne míme bad ábe bébage mó edúbé, bébelé-’ε mam míme áhɛdɛé. ³² Taasε nkōŋsé ríbootad mod eéwōgēē mbéd, bán

mod abelé mod awě béchyááne ndím anyinne'.
³³ Nzé anén mod awě achōnté me enkembé mod a Dyōb, né eéhele'aá-se ábel enén ndín e dyam."
³⁴ Δόο ábê bad békwentanné mó bán, "Béchyáá we á mbéb-te, ékwōg-ke á mbéb-te, βοη βοοβ éhéde sé ayáged-ε?" Héé dóο bébídté mó á ndáb e mekáne.

Ndím e edóðəŋ

³⁵ Ade Yesue áwógé bán bébídté ane mod awě ânchoódté á ndáb e mekáne, anhed mó. Ade ányíne mó, ansédéd mó aáken, "Edúbpé Mwǎn-a-Moonyon-ε?" ³⁶ Ane mod antimtén mó aá, "A-Sǎŋ nzéé adé Mwǎn-a-Moonyon, láá mé ábel nén rídúbe mó?" ³⁷ Yesue anláá mó aá, "Emaá mó anyín, nyúmō-'aá nyékale' nén." ³⁸ Héé ane mod áhóbéé aá, "A-sǎŋ, ndúbpé!" Abwóg-ke mebólón ábe mó edúbé. ³⁹ Yesue anhób aá, "Mpedé á nkōŋsé wén, ákáad bad ábel nén bad ábe békwédé ndím bényínen, ábe bō-'ε bényinne', békwe ndím."

⁴⁰ Ade donje á Befarisia ábe bóobe Yesue bémbē áhed béwógé nê, bēnsédéd mó bánken, "Sêdúbpé bán, weehóbéé wéé sémpē sêkwedé ndím?"

⁴¹ Yesue anláá bó aá, "Nzé nyênkwe ndím, né mbéb méesaá nyé á yǎl. Βοη βοοβ áde nyéhóbéé bán nyênýinne', mbéb rídíí rídé nyé á yǎl."

10

Ngan e Nnən a rídyəŋ ní mbód ne éche mbód

¹ Yesue anhób aá, "Ne mbále, nlânge nyé mēé, kénzéé awě eépoó á mmwe mé abem á mbód, βοη átím achágé pēd empée, adii nchíb, abé-'ε mod e ewúen. ² Mod awě apoo' á mmwe mé abem môdé

Nnɔn a ndyɔŋ ní mbód. ³ Mod awě anɔne abem adibnad mɔ ekob. Achəge mbód tée ne dɪn, ábídñē-’ε chɔ. ⁴ Abídñē-’aá chɔ, atómén chɔ, chɔ-’ε éhídē mɔ, áyāle ébíí éche ehób. ⁵ Bonj échē mbód éehídéé nken mbéd. Ebelé’ ébāā’ mɔ á yāl báán, áyāle éecheméé éche ehób.” ⁶ Yesue ankalé bó enén ngan bonj bénkənsɔŋtənné.

*Yesue aá mɔɔ módē
Nnɔn a ndyɔŋ ní mbód a bwām*

⁷ Né-ɔɔ, Yesue ambád ámpē aá, “Ne mbále, nlāŋge nyé nén mε-εé, mée ndé mmwε mé ekob wée mbód époo’é. ⁸ Byánán mǽpǽ, bad bésyāā́ ábe bésébpé apε bébédéé bechíb ne bad bé ewúen, bonj mbód éekənwógənné bó. ⁹ Mε-εé ndé ekob. Kénzée awě apoo áwəm, áküd e’soosɔŋ. Asɔl, abíd-tε ésebán mod atagte mɔ. Akud-tε kéchéé éche áhedéé. ¹⁰ Nchíb apag dásɔ áchíb, áwúu ne ábébed. Mpedé ábel bonj békud alongé áde álóné mbon. ¹¹ Mε-εé ndé nnɔn-a-mbód a bwām. Nnɔn-a-mbód a bwām adé mbonjén áwé á nló míme éche mbód. ¹² Mod awě bétédé á nsón tédén, ánɔn mbód, áde mwən éesaá nnɔn-a-mbód, áde éesaá-’aá nwóó-mbód, ányíneé nyínén née ngə ehúé’é, áchēñē mbód, atóm mehélé. Ene pónde dɔɔ ngə ésogéé mbód, échíníí-’ε épántéd áte. ¹³ Ane mod atóme mehélé áyāle adii mod awě bétédé á nsón tédén, eewɔŋneé échē mbód pónde. ¹⁴ Mée ndé nnɔn-a-mbód a bwām. Mbíí échem mbód, échem mbód-tε ébíí mε. ¹⁵ Melemlem nê dɔɔ Titée ábíí mε, mε-’ε mbíí mɔ. Mbɔŋséné-’ε áwé á nló míme échem mbód. ¹⁶ Nwóó-’ε mbód émpēé éche éesɛ á abem-tē wén, ntəŋgéné chɔmpē apεen, chɔmpē éwɔg

échem ehób, né-óó, abem débē ahóg, nn̄on-a-mbód-te nhóg. ¹⁷ Titée adáó me, áyāle mbõhséné áwé ábel níkud ádēm alongé ámbíd ámpē. ¹⁸ Modmod eékobnéé me ádēm alongé, boḡ mbage dó ne mm̄en. Nwóó ngíne ábe ádēm alongé, nwóó-’e ngíne átéd dó ámpē. Nén dóó Titée álánḡe me aá mbel.”

¹⁹ Abén e’yale ábe Yesue bêmpēén nkabén áfíntē e bad bé Israel ámpē. ²⁰ Bó bad híin béhóbé’áá nén bán, “Edáádəḡ é mbéb édé mó áte, apedé m̄in. Chán nyéhēle nyéwōḡlān m̄ó?” ²¹ Boḡ bēmpēe béhóbé’áá bán, “Mod awě edáádəḡ é mbéb edíí áte eehóbéé échén ndín e mekan. Edáádəḡ é mbéb éhēle ébēl mod awě akwedé ndím anyíen-ε?”

Bad bé Israel bébáá Yesue á yāl

²² Ngande e Nnamed ní Ndáb-e-Dyõb ékóbté’áá á Jerusalem. Nén ábédé á pondé éche ahéb ábágkē bwāmbwam. ²³ Yesue ahyómmé’áá á abepé á Ndáb-e-Dyõb áde béchágé’áá bán Abepé áde Solomonε. ²⁴ Bad bé Israel bēnləḡned mó, bésēdté mó bán, “Póndé ehéé wεwε wésōḡkē sé abane á edibelónéé-te? Nzé wε-εé edé Ane-awě-Béwóḡté, épanléd sé áte.” ²⁵ Yesue ankwentén aá, “Mmaá nyé aláa, boḡ nyéedúbpéé. Nsón míme mbelée á d̄in áde awēm Titée, m̄en mbíde me mbóḡ. ²⁶ Boḡ nyéedúbpéé áyāle nyéesaá échēm mbód. ²⁷ Echem mbód éwóḡe échēm ehób. Mbíí chó, chó-’áá éhíde me. ²⁸ Mbage bó alongé áde déemaá’, béewáá-’áá mbéd. Modmod eéhēlēē-sε ásoḡ bó áwēm mekáá. ²⁹ Chõm echē awēm Titée ábágé me

étomé chõm esyāāl, * modmod eéhēlēē-se ásog bó á mekáá míme Titéε. ³⁰ Sé Titê sêdii mod nhóg.”

³¹ Bad bé Israel béntēd meláá ámpē álúm Yesue. ³² Boη anláá bó aá, “Nlúmté nyé ekud é nsón mí bwâm éche ébídé ne echem Sáh. Nyêhede me meláá alúm, áwúu me. Mmê nsón ríhée nyéhedeé me meláá alúmen.” ³³ Dóo békwentanné bán, “Sééhēdēē we meláá alúm áyāle nsón mí bwâm míme ébélé. Boη sélúme we meláá áyāle esyáó Dyõb.” ³⁴ Yesue anláá bó aá, “Ngómē éténlédé áwen Kálag e Mbéndé nén bán, Dyõb áhóbé aá, ‘Nyêdii myõb.’ ³⁵ Debíí nén bán, eyale é Dyõb éekwagké. Dyõb dēnchǎg bad ábe ánlómēnnē échē eyale aá bédii myõb. ³⁶ Me-εé Dyõb ánámté boη alóm-me á nkõηsé, chán-nō nyéhele nyéhōbē bán, nsyáó Dyõb áyāle rítúmé ahób meé ndii Mwān a Dyõb? ³⁷ Nzé meébēlē nsón míme Titéε, nyéedúbpe me. ³⁸ Boη nzé édé nén bán mbele mó, nyêdúbé míme nsón ké nyéedúbpe mmēn, ábel nén nyébii nyésõηten-ne ngen póg ne esyāāl nén bán, Titéε adé me áte, me-ε mbé mó áte ngen póg ne ngen esyāāl.”

³⁹ Mmēn mam míme ánhōbpē mēmbēl bēnwanén mó akób ámpē, boη ambíd bó á mekáá.

⁴⁰ Ambíd enê, Yesue antím ámbíd á ped e edíb é Jodan eníní, á abwóg á hõm wéε Jone, Ndusene ádúsánnáá bad, ádyēē áhed. ⁴¹ Ndun e mod epagé’áá áwē. Abê bad béhóbé’áá bán, “Jone, Ndusene eébele’aá menyáké boη kéchéé éche áhóbé t̄ηgene anén mod édé mbále.” ⁴² Né-óó, ndun e mod echē embé áhed, endúbé Yesue.

* **10:29** Chõm echē awēm Titéε ábágé me étomé chõm esyāāl: donge á kálag dé’só áwóó Titéε awē abagé me bó, atómé chõm esyāāl.

11

Kwééd eche Lazarose

¹ Mod nhóg ambé awě béchágé'áá bán Lazarose, akõnlé'áá. Lazarose ne baányan bé bebaád, Maria ne Mataa bédyéé'áá á dyad á Betani. ² Anén Maria awě mwānyan Lazarose ákõnlé'áá, mō anwógéd Yesue dyǒg dé elod é bwâm á mekuu, boŋ apinnéd échē esid. ³ Né-ǒó, Maria bó Mataa bó bénlōm nsəl wée Yesue bán, “A-Sán, awonŋ nsón a nlém akonle’.” ⁴ Ade Yesue áwógé nímén nlébtéd anhób aá, “Mmén nkole méesógké ne kwééd. Nén ábénlédé ábe Dyõb ehúmé, ábel boŋ Mwān a Dyõb ákud edúbé.” ⁵ Yesue andǎŋ Mataa, Maria ne Lazarose. ⁶ Ké nê, áde áwógé bán, Lazarose akonle andii ambé wée ámbēē e’pun é’be. ⁷ Hée álângeé ábē bembapere aá, “Détim ámbíd á Judeya.” ⁸ Dóo ábe bembapere bélângeé mó bán “A-meléed, kíné saá áwed dóo bad béhédé'áá we meláá awúen súútǎŋ’ε?” ⁹ Yesue ankwentén bó aá, “Eesaá mbále bán mǔte níwóo dyôm á háwa ne ébe-ye? Bad ábe békag mǔte béekwagké áyāle bédé ne ane awě adé e’nyínen bé ekíde bé nkõŋsé. ¹⁰ Boŋ nzé békag nkuu, dóo békwagké áyāle e’nyínen bé ekíde béesaá.” ¹¹ Ade Yesue amáá ahób nén ambád ámpē aá, “Awed nsón Lazarose akúne, boŋ nkag mó anyem ásē.” ¹² Abē bembapere bēnlāā mó bán, “A-Sán, nzé akúne né ádyéé bwâm.” ¹³ Yesue ahóbé'áá nén áyāle ambíí aá, Lazarose awédé, boŋ ábē bembapere bēnwēmtēn bán, ahóbe aá, akúne kúnén. ¹⁴ Né-ǒó, Yesue ampanléd bó áte aá, “Lazarose awédé, ¹⁵ boŋ á yǎl echên, ndé menyiŋge nén meé

meebédeé áhed ábel bon nyédúbe. Syánē dékag-kóó áwed bóob.” ¹⁶ Hê dóo Tómasē (awě bēnchuu’ē bán, Nhéd) álāngēé baáb bembapēē aá, “Syánē ámpē dékag áwed ábel bon nzé kwééd chó edé déwê ne Meléede.”

Yesue mó adé mpuu ne alongé

¹⁷ Bóob-póó, áde Yesue ápedé á Betani, antán nēē bémáá Lazarose alíme. Ene pónde né nímē ndim níkébē á son-tê e’pun é’niin. ¹⁸ Bootya á Betani ápe á Jerusalem ábedé dyan máyl mébē. ¹⁹ Ekud é bad bé Israel ênhyě wēē Mataa bó Maria áwenned bó áyāle kwééd eche awab mwānyā. ²⁰ Ade Mataa áwógé bán, Yesue ahúé’, ankě mó abomen á nzii, bon Maria anlyăg á ndáb. ²¹ Dóo Mataa álāngēé Yesue aá, “A-Sāj, nzé wembé hén né mwānned eewédeé. ²² Bon ké nê, mbíí meé ké bóob kéchéé éche ésédté Dyöb, Dyöb débě wē.” ²³ Yesue anláá mó aá, “Mwānyonj äbē á alongé ámpē.” ²⁴ Mataa antimtén mó aá, “Mbíí meé äpuú á pónde e mpuu mbwē mé asóg.” ²⁵ Dóo Yesue alāngé mó aá, “Me-éé ndé mpuu né alongé. Nzé mod adúbpé me, ké anwé, äbē abé á alongé. ²⁶ Kénzēé awě adé á alongé bon adúbé-’ε me, éewáá mbêd. Edúbpé né-yε?” ²⁷ Héē Mataa ákwentanné aá, “Éε, A-Sāj, ndúbpé meé wε-εé edé Ane-awě-Béwógté, Mwān a Dyöb awě Dyöb áhóbé aá, äpē á nkōjsé.”

Yesue achii

²⁸ Ade Mataa áhóbé nê, antīm ámbíd, ákē áchag mwānyā Maria kun, aláá mó aá, “Meléede adé hén, asεdte-’ε wē.” ²⁹ Ade Maria áwógé nê, anhidé ásē mehélé, áke atán Yesue. ³⁰ Bóob-póó, Yesue enkēmpaá asól á dyad-tê, andíi ambé wēē Mataa

ántānnē mó. ³¹ Ade bad bé Israel ábe bébedé á ndáb-te ne Maria áwenned mó, bényíne née ábídé á ndáb-te ne mehélé, anyəgte á soŋ, bēnwēmtēn bān, akag achii. Né-óó, bēnhīd mó.

³² Ade Maria ápédé wée Yesue ámbēē boŋ anyín mó, ankwě mó á mekuu, ahób aá, “A-Sán, nzé wembé hén, né mwānned eewédeé.” ³³ Anyín áde Yesue ányíne née Maria áchyeé’é, anyín-ne née bad ábe bēnhīd mó béchyeé’é, ngəl enkonned mó, átāg-ke áte á nlém-tê bwāmbwam. ³⁴ Ansédéd aáken, “Héé nyélimmé mó?” Bēnkwentēn bān, “A-Sán, hyě ényín.” ³⁵ Yesue anchií. ³⁶ Héé bad bé Israel béhóbéé bān, “Nédē ankōŋ mó adəŋ-óó!” ³⁷ Boŋ bó donge á bad bēnhōb bān, “Ngómē ambēl mod awē ankwē ndím ányinne. Eéhele’aá-se ábel Lazarəse eewág-ε?”

Yesue apuídté Lazarəse

³⁸ Ngəl enkonned Yesue á nlém ámpē. Né-óó, ankě á soŋ. Ene soŋ ebédée soŋ echě bēpwógé aláá áte, boŋ békútēn chó nsəl ne aláá. ³⁹ Héé Yesue álāngeé ábē bad aá, “Nyéhūd ádé aláá.” Dóó Mataa, mod awē awédé mwānyan áhóbéé aá, “A-Sán, ndim mémād abooted dé achum bəəb áyāle ríkíde mbé á soŋ-tê bəəb e’pun é’niin.” ⁴⁰ Dóó Yesue álāngeé mó aá “Meelāngeé wε meé nzé edúbpé né wěnyín Ngum e Dyōb-ε?” ⁴¹ Né-óó, ábē bad bēnhūd ádé aláá á nsəl ní soŋ. Dóó Yesue ánóné ámīn boŋ áhōbē aá, “A-Tê, nságnéné wε áyāle éwógé me mekáne. ⁴² Mbíí meé eyōgké me mekáne awóg, boŋ nhóbe nén ábel boŋ ábén bad ábe bédé hén bédúbe bān, wε-éé elómé me.” ⁴³ Ade áamáá ahób nê dóó

áchágté ehób ámin bon áchēnlē Lazarose aá, “A-Lazaros, bíd áwed!” ⁴⁴ Ane mod awě ammad awé abíd-te áwed. Mbóm éche bēnkaánné mó mekuu ne mekáá ne tumbe echě bēnkaánné mó e’só, émbē ébē mó á yǎl. Yesue anláá bó aá, “Nyéhune mó ábē bwēm á yǎl, ákag.”

Béhagke Yesue

(Mat 26.1-5; Mak 14.1-2; Luk 22.1-2)

⁴⁵ Bad bé Israel ábe bēnkě Maria á mewenned bényin mekan míme Yesue ámbēnlé, bēndūbē-ε Yesue. ⁴⁶ Bon bó donge á bad bēnkě Befarisia atán, béléáá bó mam míme Yesue ábélé. ⁴⁷ Héε beprise bémbáá ne Befarisia béchénlé mbom ní káánsel. Bēnhōb bán, “Cheé débēnlé bōob? Detəngéné dyam abel áyāle anén mod abele menyáké bwāmbwam! ⁴⁸ Nzé detědté bán, ákeεne nímén mekan á’sō né moosyāál ádūbē mó. Nzé moosyāál adúbpé-ε mó, né bad bé Roma bépě, békōbēn-ne syánē eched Ndáb-e-Dyōb, békōbēn-ne syánē ádēd alon.” ⁴⁹ Dóo mod nhóg átínté echáb awě béchágé’áá bán Kaifase, awě abédé prise ambáámbáa nímē mwě, áhóbéé aá, “Nyéebíí’é dyamdyam. ⁵⁰ Nyéenyínéé nén bán ébóó bán, mod nhóg áwē á nló ní moosyāál tómaa alon ásyāāl ábóó?” ⁵¹ Kénéε áhóbé’áá nē, saké nímē mewēmtēn mēn móo áhóbné’áá nē. Ngáne abédé prise ambáámbáa nímē mwě, áhóbé’áá dyam áde débēnléd, á’sō é’ pónde, aá Yesue áwē á nló ní bad bé Israel. ⁵² Saá-kaá á nló ní bad bé Israel bēnpēn, bon kəhne álad bad bé Dyōb bésyāāl ábe bémáá ahented áte hōm ahóg, ábel bēbē mod nhóg.

⁵³ Bootya échē epun bad bémbáá bé Israel bēmbootéd Yesue ahəge, áwúu mó. ⁵⁴ Nén dēmběl

Yesue eebíde'aá á nhéné ámpē átíntê e bad bé Israel. Bóobe ábē bembapεε bēnhidé békē á dyad áde béchəgεé bán Efrem, bédyεε-'ε áwed. Adê dyad ábédé bεnbεn ne ehyánge. ⁵⁵ Póndé e ngande e Nnyíme-ámīn embé bεnbεn. Né-ɔ́, bad hīin bémbíid myad ne myad, békē á akuu á Jerusalem áwobe échab yəl ngáne mbéndé e Mosεε éhédé'aá, áboŋsen ngande e Nnyíme-ámīn. ⁵⁶ Abê bad bé Israel bémbé bēhedé Yesue. Ade bélédné á Ndáb-e-Dyöb bésédte'aá, nhóg ne aníní bánken, "Chán nyéwémténé, nyédúbpé bán, áhyε ngande-yε?" ⁵⁷ Beprise bémháá ne Befarisia béntómēd ehəngé bán, kénzéé awě anyíne Yesue áhyε áláa bó, ábel boŋ béköb mó.

12

Béwógté Yesue á Betani (Mat 26.6-13; Mak 14.3-9)

¹ Ade ngande e Nnyíme-ámīn élyágé e'pun ntóob, Yesue ankě á Betani wée Lazarose awě ámpuúdté ádyéé'aá. ² Bémbeleé Yesue ndyééd áhed. Mataa mó antómēd ene ndyééd. Lazarose ambé nhóg átíntê e bad ábe bóobe Yesue bēbédé á tébele ádyé ndyééd. ³ Héε Maria átédé epom é dyög dé elod á bwām áde álélé nkun bwāmbwam. Adê dyög bēbénlé dó nád.* Anwógéd Yesue á mekuu, apíné-'ε mó mekuu ne échē esid é nló. Elod é bwām énləg ndáb áte esyəál. ⁴ Dóo Judas Iskariode, mbapεε nhóg awě émbēē bán mó əsōm Yesue áhóbéé aá, ⁵ "Cheé bénkēnsómmé ádén dyög, bétéd mímén mənέ békē bēbē betóótökē bé bad?"

* **12:3** Nád: Nád edii mbonja echě ewóo elod é bwām eche bēbenléé mǝg mé elod é bwām.

Béhélé'áá-sε bésóm adê dyǒg dyam-ée áde nsábe ní mwě nhóg.” ⁶ Judase anhób nê, saké áyāle abédé betóótōkē bé bad ngol, boŋ áyāle abédeé nchíb. Ngáne ábédé mod awě awánládtáá bóbōo ekwε é mōné, ayǒgkē'áá mōné atéd ámbíd. ⁷ Boŋ Yesuε anhób áá, “Tédé mó, ákoo áde ályágé ásē ábel boŋ ábenled dó mbwε míme béliimēē mε. ⁸ Betóótōkē bé bad bédé ne nyé pónde téé boŋ mε pen méebáá ne nyé pónde ésyāāl.”

Béhəgke Lazarəse

⁹ Ene pónde-ōó, bad bé Israel hiin bēnwōg bán, Yesuε adé á Betani. Né-ōó, bēnkě áwed. Saké Yesuε mwēmpen mó ankǎŋ boŋ békē áwed, boŋ bēnkě Lazarəse anyín awě Yesuε ámpuúdté. ¹⁰ Né-ōó, Bepriε bémbáá béhǒgkē'áá kǒŋne Lazarəse áwúu mó, ¹¹ áyāle bad bé Israel bétédté'áá bó, bédūbpē Yesuε. Béndūbē Yesuε áyāle dyam áde dēmbenléd ne Lazarəse.

Yesuε asólé á Jerusalem née kǎŋ

(Mat 21.1-11; Mak 11.1-11; Luk 19.28-40)

¹² Née bīn é'sǎngé, ndun e mod echě enhyě á Ngande e Nnyíme-ámīn bēnwōg bán Yesuε apag á Jerusalem. ¹³ Hê dōó bésélé e'kikag é' mii boŋ békǎg mó abomen á nzii. Béhágé'áá e'saad bán, “Hosána! Nnam núbê ne ane awě apedé á dīn áde Sǎngwée. Nnam núbê ne kǎŋ e bad bé Israel!”

¹⁴ Yesuε ankūd etum é ésel, áđī-'ε chó. Nén dēmbenléd ngáne éténlédé á kálag e Dyōb nén bán,

¹⁵ “A-bad bé Zayon, nyéebáá', nyénone' echen kǎŋ ehúé', edíídé-'ε etum é ésel.”

16 A póndé echě nímén mekan mébénlédé, be-
mbapεε ábe Yesuε bénkênsóηténne. Boη áde
Yesuε ámpuú'ε ne ehúmé é Dyōb, dóo bēnchemmé
bán mam níme mébénlédé t̄ηγεne Yesuε móo
mēntenléd, á yǎl eché.

17 Ndun e mod echě embé ne Yesuε áde áchénlé
Lazar̄σε á son-tê boη ápuudté mó, embé ékalé'
nímê nkalan. 18 Né-óó ndun e mod enkě Yesuε
abomen áyāle ábén e'chemléd bé menyáké ábe
ámbeñlé. 19 Héε Befarisia bélânγεέ nhóg ne aníní
bán, “Nyénone! K̄ηne b̄ob deéhéléé dyamdyam
abel. Nk̄ōsέ r̄isyāēl r̄híde mó.”

Bad bé Grikia béhede Yesuε

20 Donje á bad bé Grikia bémbē átíntē e bad ábe
bēnkě ngande e Nnyíme-ámīn á Jerusalem, áke dé
abe Dyōb edúbé. 21 Bēmpě wέε Filibe. Filibe awě
ambíd á dyad á Betsaida á mbwóg e Galilia. Bénlāā
mó bán, “A-Sāη, sēd̄áó Yesuε anyín.” 22 Filibe
ankě Andreyā alāa. Dóo bó bad bébe békíí Yesuε
alāa. 23 Yesuε ankwentén bó aá, “Póndé epedé echě
ehúmé e Mwān-a-Moonyoη énnynēdtē. 24 Ne
mbále, nlânge nyé nén mēé, mbum e ngun póg edii
mbum e ngun póg, k̄áōη né bēwéné ch̄ó á nd̄ob-
tē boη ewé. Ewág-kāa, boη echyáá mbum é ngun
émpēe éche ébúú áte. 25 Mod awě ad̄áó adē alongé,
āb̄ōd dó. Mod awě mó-'ε ak̄áó adē alongé, á nk̄ōsέ-
te wén, āk̄áó dó á alongé áde déemaá'. 26 Kénzéeé
awě abenle με, at̄āηgéné awēm mb̄aledε abé. Ké
hée-'ε wέε r̄ídíí, awēm mb̄aledε at̄āηgéné abé áhed.
Echem Sāη ābē-'ε kénzéeé awě abenle με edúbé.

Yesuε ahóbé t̄ηγεne eche kwééd

27 “Bɔɔb-pɔɔ, nlém rítage me áte. Chee-ɔ méhɔbpē? Nhɔb meé, ‘A-Tê, weémwāg-se metake míme méhúe’ métán me-ye?” Aáy, méehɔbpé nê, áyāle enén pónde e metake chɔ ekáɔ boŋ nípag wén. 28 A-Tê, lúméd echɔŋ ngum.” Héε ehɔb ébídeé á Dyɔb nén bán, “Nlúmté echêm ngum, mǎlúméd-te chɔ ámpē.” 29 Ene ndun e mod echě embé áhed enwóg éché ehɔb. Bénhɔb bán dyɔb dɔɔ ákúme áte. Bad bémpēe bénhɔb bán, ángel chɔ ehɔbé áwē. 30 Yesue anláá bó aá, “Áyāle echên dɔɔ échén ehɔb ébíde, saké áyāl echêm. 31 Pónde epedé echě Dyɔb dékǎádté mímén nkɔŋsé. Nkamlɛn míme nkamlɛne á nkɔŋsé mékwě bɔɔb. 32 Boŋ áde bémadté me anyen ámín, mǎdɔl bad bésyāál áwēm.” 33 (Yesue anhɔb nê álúmed ndín e kwééd echě áwē.) 34 Ndun e mod echě embé áhed enkwɛntén mó bán, “Séwógé á mbéndé-te bán Ane-awě-Béwǔgté ábē á ngíndé ne á ngíndé. Chán-nɔ éhɔbéé wéé ‘Bétǎŋgéné bényēn Mwǎn-a-Moonyoŋ ámín.’ Nzéé adé anén ‘Mwǎn-a-Moonyoŋ?’ ” 35 Dɔɔ Yesue álǎŋgéé bó aá, “E’nyínen bé ekíde bébē ne nyé á esóŋ e pónde ngên. Nyékag bɔɔb áde e’nyínen bé ekíde é’díi é’díi, ábel boŋ ehíntén éékɔbē nyé. Mod awě akag á ehíntén-té eebyéé’é wéε ákagké. 36 Nyédúbe e’nyínen bé ekíde bɔɔb áde é’díi ne nyé, ábel nén nyébê bán bé e’nyínen bé ekíde.”

Bad bé Israél béedii béedúbpé Yesue

Ade Yesue áamáá mímén mekan mésyāál ahɔb, antedé bó, áke ásɔɔm wéε béenyínné mó. 37 Kénéε ene ndun e mod énnýínnē ábén e’chemléd bé menyáké é’syāál ábe Yesue ámbɛnlé, bénkëndúbéé

mó. ³⁸ Nén dēmbēnléd âlóned e'yale ábe nkal é'dáǎdǎŋ Yesayaa ánhǎbpē aá,

“A-Sáŋ, nzéé adúbpé eyale éche sékálé, nzé-módé akidényin ngum echǎŋ áchēm-me chó?”

³⁹ Né-ǎǎ, béehēle'aá-se bédúbe. Yesayaa ahóbé hǎm démpēe aá,

⁴⁰ “Dyǎb ákwidé bó ndim, ábē-'ε bó nlém mé aláá, ábel nén nímab mǐd méēnyinnē', béēsǎŋtanne.

Nzé bēbélé-'ε nê, né bétimén me, né mǎchoód-te bó.”

⁴¹ Yesayaa anhób nén áyāle annyin ehúmé éche Yesue, anhób-pe áyāl echê. ⁴² Ké nê, bad hiin béndūbē Yesue, kǎŋne donge á bad bémháá. Bon

ngáne bēháá'áá Befarisia, bēnkēnlúmédte yǎl, ábáŋ nén bán béēbǐdté bó á ndáb é mekáne.

⁴³ Bēbélé'áá nê áyāle bēndǎŋ mekenag mé baányon tómaa mé Dyǎb.

E'yale ábe Yesue békāād bad

⁴⁴ Héε Yesue áchǎgté ehób ámin áhǎbē aá, “Kéznzéé awē adúbpé me, eedúbpēé mmēmpen,

adúbpé kǎŋne ane awē alómé me. ⁴⁵ Kéznzéé-'ε awē anyiné me, anyiné ane awē alómé me. ⁴⁶ Mpedé

á nkǎŋsé néε e'nyinen bé ekide, ábel bon kéznzéé awē adúbpé me, eélyāgē á ehintén-tê. ⁴⁷ Kéznzéé

awē awógé ábēm e'yale, bon eékonge bó, saké me nkáadte mó. Meekáádtéé mó áyāle meépedéé

ákaad nkǎŋsé bon mpedé áson bad bé nkǎŋsé. ⁴⁸ Kéznzéé awē abáá me á yǎl bon eékobe-'ε ábēm

e'yale, awóó mod awē ákāād mó. Ábēm e'yale bēn bóǎ békāād mó á mbwe mé asóg. ⁴⁹ Ebê nê,

áyāle meehóbēé nímén mésyāāl ne echēm kunze. Bon Titée awē alómé me, aláŋgé me chǎm éche

ńtą́ngé né ahób. ⁵⁰ Mbíi meé kéchéé éché álángé me aá nhôb épeene alongé áde déemaá'. Né-òó, kéchéé éche nhóbéé, nhóbe' chọ ngáne Titée álángé me."

13

Yesue awôbpé ábē bembapee mekuu

¹ Epun é ngande e Nnyime-ámìn ênlyăg nées chăn. Yesue ambíi aá eche pónde emaa ape eché mótą́ngé né nkôńsé atede, áke wées eche Sáj. Andăń bad bé nkôńsé ábe béndübē mó, alúméd-te éché edăńge káąńe á asóg.

² Yesue ne ábē bembapee bedyágé'áá ndyééd ngukél, Satane-'e ammad Judas Iskariode mwăn awě Simone mewêmten mé mbéb ásóled áte ásóm Yesue. ³ Yesue ambíi aá eche Sáj abagé mekan mésyāal áwe mekáá. Ambíi-'e aá móhūū wées Dyôb mótíme-'e ámbíd wées Dyôb. ⁴ Ade bedyágkē ndyééd nê, Yesue anhidé ásē, ahúd nkob á yăl, atád tábele á nkog. ⁵ Héé áhédé mendíb á kúmbe-tê, bon ábootéd ábē bembapee mekuu awobe, ápinnād tábele awě ánwāā'é á nkog. ⁶ Ade ápédé wées Simon Petro dóo Simone ásedtée mó aá, "A-Sáj, ehede me mekuu awobe-ye?" ⁷ Yesue ankwentén mó aá, "Weéhēlēē-se esóńtén dyam áde níbeleé bôob, bon ámbíd e nímén mésyāal dóo wésóńtēnnē." ⁸ Héé Petro áhóbéé aá, "Aáy, weéwôbpéé me mekuu mbéd." Yesue antimtén mó aá, "Nzé meéwobpe we mekuu né wéewóńgé dyamdyam abelen ne me." ⁹ Simon Petro anláá mó aá, "A-Sáj, né saké mekuu mëmpen-éé wéwobéé me. Wéwobé me káąńe mekáá ne nló!" ¹⁰ Yesue ankwentén aá, "Mod awě amaa mendíb awog, yăl esyāal emaa

mó asán, eetânɣeneé mendíb awóg ámpē, étōmēé áwobe mekuu.* Nyêmaá asán, boŋ saké nyé moosyáál nyêsaá.” ¹¹ Yesue ammah abii mod awě äsōm mó. Née dēnkǎŋ boŋ ahób aá saké moosyáál asáá.

¹² Ade ámaá bó mekuu awobe, anhé nímē nkob á yǎl, átīm ámbíd áwē e'dii. Héé ásedtēé bó aáken, “Nyêsóŋténé dyam áde míbénlé nyé-yé? ¹³ Nyêchæge me Meléede, nyêchæge-'ε me Sánɣwéé. Nyétánɣéné, áyāle nê dēn dōó rídíí. ¹⁴ Né-ǎǎ, nzé me awě ndé nyé Sánɣwéé mbé-'ε nyé Meléede nwöbpé nyé mekuu, né nyémpē nyétánɣéné nhóg ne aníníí mekuu awobe. ¹⁵ Nlúmté nyé elánɣén éche nyétánɣéné ahíd ábel nén nyémpē nyébel ngáne míbénlé nyé. ¹⁶ Ne mbále nlánɣe nyé nén meé, mbaledε eetóméé eche sán, mod awě bélómé-'ε eetóméé mod awě alómé mó. ¹⁷ Bǎǎb áde nyébíí nímén mam, nnam mébē ne nyé nzé nyébele mó.

¹⁸ “Meehóbéé nyé moosyáál. Mbíí bad ábe nɣpwédé. Boŋ e'yale ábe é'ténlédé á Kálag e Dyöb é'tánɣéné alón. Eténlédé nén bán, ‘Mod awě súmō sēdyâg ndyééd akūnnéné me yǎl.’ ¹⁹ Nlánɣe nyé nén bǎǎb, áde éebēnlēdēē ábel nén nzé ébénlédé, nyédúbe nén bán, ‘Ndíí mó Awě Ndíí.’ ²⁰ Ne mbále, nlánɣe nyé nén meé, kénzéeé awě akobé mod awě nílómé, akobé me. Kénzéeé-'ε awě akobé me né akobé ane awě alómé me.”

*Yesue ahóbé á'sō é' pónde aá bésōm mó
(Mat 26.20-25; Mak 14.17-21; Luk 22.21-23)*

²¹ Ade Yesue ámaá nímén mekan ahób ndutul enlóg mó á nlém-tê, ápanléd-te ábē bembapεe áte

* **13:10** Donɣe á kálag dé'só déewóó'é éetóméé áwobe mekuu.

aá, “Ne mbále, nlânge nyé nén meé, nyé mod nhóg äbë me á mekáá mé bad bé ekoyí.” ²² Héé äbë bembapεε Bénónné á mesó, áyāle bēnkēmbíí’ē mod awě áhóbεé. ²³ Mbapεε nhóg, awě Yesuε āndāngé, andyě mó á akéb. ²⁴ Dóo Simōn Petro ápebtanné ane mbapεε mīd, áhōbē aá, “Sedéd mó mod awě áhóbεé.” ²⁵ Dóo ane mbapεε ásidté Yesuε á yāl-tē, ásedté mó aáken, “A-Sán, nzéé éhóbεé?” ²⁶ Yesuε ankwentén mó aá, “Mod awě métōdéé ewele á dīse-tē boŋ níbe mó, mó adé ane mod.” Héé átédé ewele, átōdté á dīse-tē, ábagé Judase, mwān awě Simōn Iskariōde. ²⁷ Akob áde Judase ákóbé échē ewele, Satane ansól mó áte. Dóo Yesuε álāngéé mó aá, “Dyam áde éhedéé abel bël dó á mehélé-te.” ²⁸ Boŋ mod ké nhóg awě bóbōo bēdyágé’áá ndyééd enkēnsōhténné chōm-éé ékáá boŋ Yesuε aláá Judase nē. ²⁹ Ngáne édíí bán Judase mō akōngé’áá ekwe é mōné, donge á bembapεε bēnwēmtēn bán Yesuε álāngé mó aá áke áchan bwēm ábe bébenlédté á ngande, ké’ε chōm éche bébεé betóótōkē bé bad. ³⁰ Ade Judase ákóbé ewele éche Yesuε ábágé mó kobén, ambíd ebwóg. Ehíntén ênkwe.

Yesuε abagé mbéndé e ekóólé

³¹ Ade Judase ámáá abíd dóo Yesuε áhóbεé aá, “Bōob-pōó ehúmé e Mwān-a-Moonyon ényínnédé. Ehúmé é Dyōb-pe ámpē ényínnēd mbwiined ne mwān. ³² Nzé Dyōb ákúdé ehúmé ámbíd e Mwān, né Dyōb dēn ámpē débël ehúmé é Mwān ényínned. Abël-le nē ábwōg-ábwōg. ³³ A-baányan, echem pōndé ábé ne nyé, edé esón. Nyéēhēd me, boŋ ngáne ménlāā’ē bad bé Israel, melelem nē

dóo rílanḡeé nyé bɔɔb, mɛé, ‘Wée ríkagké, nyéehenlé aɛ áhed.’ ³⁴ Mbage nyé mbéndé ekóólé bɔɔb, nén nyédəḡ nhóg ne aníníí. Ngáne rídáá nyé, nyémpē nyédəḡ nhóg ne aníníí. ³⁵ Nzé nyédəá nhóg ne aníníí, né mod tée ábīi aá nyédíi ábēm bembapɛɛ.”

*Yesue ahábe ngáne Petro dbāḡgē mó á yǎl
(Mat 26.31-35; Mak 14.27-31; Luk 22.31-34)*

³⁶ Simɔn Petro ansɛdéd Yesue aáken, “A-Sáḡ, héé éhɛdɛé akɛ?” Yesue antimtén mó aá, “Weéhēlē-sɛ ehíd mɛ bɔɔb wée ríkagké, boḡ ámbíd e pónde wěhíd mɛ.” ³⁷ Petro ansɛdéd mó aá, “A-Sáḡ, cheé ékás boḡ meéhēlē se nhíd wɛ bɔɔb? Mbɔḡsɛné áwé á nló rímɔḡ.” ³⁸ Héé Yesue ákwɛntanné mó aá, “Ekoó aboḡsɛn dé awé á nló rímēm-ɛ? Ne mbále, nlanḡe wɛ mɛé, nchóm-a-kúb adêhób aá mótɔo’, wěbāḡ mɛ á yǎl ngen éláán.”

14

*Yesue mó adé Nzii e mbále
echě epɛɛne alongé*

¹ Dóo Yesue ábádeé ábē bembapɛɛ aláa aá, “Nyéetagté nlém á abum. Nyésum nlém wée Dyɔb, nyésum-mɛ kááḡne áwēm. ² Toḡ ébuú áte á ndáb echě echem Sáḡ. Nkag-kɛ áwed áboḡsɛn nyé hǔm. Nzé énkembé nê, né menkênláá’é nyé mɛé nkag nyé hǔm aboḡsɛn. ³ Nzé nkií-’ɛ nyé hǔm aboḡsɛn, mětīm ámbíd, ríhyɛ ntéd nyé ábē ne mɛ, ábɛl nyémpē nyébê hǔm áde rídíí. ⁴ Nyébíí nzii echě etime’ wée ríkagké.” ⁵ Héé Tɔmase álḡḡeé mó aá, “A-Sáḡ, séebíí’é wée ékagké. Chán-nō sébwéé nzii abíi echě etime áwed?” ⁶ Yesue ankɛntén mó aá, “Mée ndé nzii eché ekag wée echem Sáḡ,

mbále ehúe' ne me, me-'aá mbage alongé. Mod-mod eehēlē-se ápe wée echem Sáj, ésebán abwedé áwēm.” ⁷ Hée Yesue álângeé ábē bembapee aá, “Bəob áde nyébíí me, nyēēbīī kááŋne echem Sáj.* Bootya bəob nyēnyíne mó, nyēbíí-'e mó.”

⁸ Filibe anláá mó aá, “A-Sáj, lúméd-te sé Titée. Chōm ésyāāl éche séhédeé éetóméé nê.” ⁹ Yesue ankwentén aá, “A-Filib, nkémbē ne nyé á etūn é pónde, chán-nō éhéleé-se ehób wée mōbíí'é me? Kénzée awē anyíne me né anyíne Titée. Chán-nō éhéleé-se ehób wée ‘Lúméd sé Titée?’ ¹⁰ Weedúbpeé wée echem Sáj adíí me áte, me-'e mbé mó áte-ye?” Hée Yesue álângeé ábē bembapee aá, “Mam míme rílangeé nyé méebídeé áwēm dēn. Boŋ echem Sáj awē adé me áte mō abele rímé nsón. ¹¹ Nyédúbe me ngáne ríhóbé meé echem Sáj adíí me áte, me-'e mbé mó áte. Nzé nyéedúbpe nê, nyédúbé ké áyāle mam mé menyáké míme mbelée. ¹² Ne mbále, nlánge nyé nén meé, kénzée awē adúbpe me, ābēl mam rímé mbelée. Abēl-le kááŋne mekan míme métómé mímén áyāle nkag wée Titée. ¹³ Mēbēl-le kéchéé éche nyésédté á dīn ádēm ābel nén ngum echē Titée ényínned ámbíd e Mwān. ¹⁴ Nzé nyésédté me kéchéé á dīn ádēm, mēbel chó.”

Yesue aá mōlōm Edāádəŋ éche Esáá

¹⁵ Yesue ambád ahób aá, “Nzé nyédəá me, né nyēēhíd échem mbéndé. ¹⁶ Mēlāā Titée, ābē-'e nyé Nwōŋgene ampée, awē ābē ne nyé á ngíndé ne á ngíndé. ¹⁷ Ane Nwōŋgene mō adé Edāádəŋ

* **14:7** Bəob áde nyébíí me, nyēēbīī kááŋne echem Sáj; donge á kálag dé'só áwóó nzé nyēnkōŋ me abíí, né nyēēbīī kááŋne echem Sáj.

éché ébidte' mbále áwed tâηgene Dyöb. Bad bé nköŋsé béehelée-se békob mó, áyāle béenyīnēē mó, béebii-'aá mó. Boη nyēbīí mó áyāle adé ne nyé, ābē-'ε nyé áte.† 18 Nzé nkií, méetεδέé nyé menyuu. Mětīm ámbīd áwēn. 19 Mwāmpīn ní pónde, nköŋsé méenyīnné με ámpē. Boη nyépen nyēenyīn με. Ngáne mébēē á alongé, nyémpē nyéēbē. 20 Nzé échē epun épédé, nyéēbīí bán ndé echem Sáη áte, nyé-'ε nyēbē με áte, melemlen ngáne με-'ε nídíí nyé áte. 21 Kénzée awē akobé échem mbéndé, áhīdē-'ε chó, mō adé mod awē adáá με. Kénzée awē adáá-'ε με, echem Sáη mó-'ε ādāη mó. Mémpē mēdāη mó nlúméd-te mó yāl." 22 Dóo Judase (saké Judas Iskariōde) áhóbēé aá, "Boη A-Sáη, chán wélūmēdtē sé yāl boη weelúmté nköŋsé pen?" 23 Yesue ankwentén aá, "Nzé mod adáá με, áhīd ábēm e'yale. Echem Sáη ādāη mó, sé echem Sáη-'ε séēpē áwē, sédyēē-'ε ne mó. 24 Nzé mod eédāa με, eehídeé ádēm ayáge. Adén ayáge áde nyéwógé déesaá ádēm. Adii áde Titée awē alómé με.

25 "Nlángé nyé nímén mésyāāl áde nídíí ndé ne nyé. 26 Nwōηgene, Edáádāη éche Esáá awē Titée álōmmē á dīn ádēm, áyāgēd nyé mekan mésyāāl ābēl-le nyékamtán mekan mésyāāl níme nílángé nyé. 27 Nsaη móo níyágnédé nyé. Mmēm nsaη móo níbagēé nyé. Meébāgēē nyé mó ngáne nköŋsé níbagēé. Nyéētagté nlém á abum, nyéewógé mbwóg. 28 Nyēnwóg née níhóbé μεé 'Mēte dé nyé boη mētīm ámbīd áwēn.' Nzé nyēndāη με né nyéēwóg menyīnge bán nkag wēē Titée áyāle Titée atómé με. 29 Nlángé nyé nén bōob

† 14:17 Abē-'ε nyé áte; donje á kálag dé'só áwóó adé-'ε nyé áte.

áde éēbēnlēdēē, âbel nēn nzé ébēnlédé, nyédúbe.
³⁰ Syánē déebudté póndé awónj ákal ámpē, áyāle nkamlēne a nkōjsé ahúe'. Eewóó'ē ngíne ké póg ámín echēm. ³¹ Bonj kénê mēchennéd mós yāl mbēl ngáne echem Sáj ahóbé aá mbel, âbel bonj nkōjsé mbíi nēn bán, ndáá echem Sáj. Né-'aá ákээ bonj mbelé kéchéé éche ahóbé aá mbel.

“Nyéhyag syánē déhide hén.

15

Yesue mâ akoó alín dé epum á bwel abé

¹ “Mē-éé ndé alín dé epum é bwel, alín dé epum é bwel dēn dēn. Echēm Sáj-'e abé mbelé-nzag.
² Ahúde' ngen ké ehéé echē edé mē á yāl, echē eechyáá' e'pum, ápagké-'e ké ehéé echē echyáá' e'pum, âbel bonj ébonj yāl ébude-'e achyáa. ³ Ayáge áde ní'yágté nyé ábéle nyēmaá asáj. ⁴ Nyélyāg nyébē ne mē, mémpē mēlyāg mbé ne nyé. Ngen chēn eēhēlē-se echyáá e'pum áde éesaá á alín á bwel. Melemlem néē nyémpē nyéehēlé-se nyéchyáá e'pum ésebán nyédé ne mē.

⁵ “Mē-éé ndé alín dé epum é bwel, nyé-'e nyébé ngen. Nzé mod adíí adé ne mē bonj mē-'e ndé ne mós áchyāā e'pum bwāmbwam. Nyéēhēlē-se nyébēl dyamdyam ésebé ne mē. ⁶ Nzé mod eēsē ne mē, bēhūd mós néē ngen. Ene ngen ebelé ekintéd. Béladéé échē ndín é ngen áte, bēbwém chó á muú-te, éhyāj-'e. ⁷ Nzé nyédíi nyédé ne mē, bonj ádēm ayáge-'e ádíí adé nyé áte, kéchéé éche nyésédte, nyéēkūd. ⁸ Edúbé éche echēm Sáj ényínnad nzé nyēbudé e'pum achyáa, nē-'aá débēl nyébé ábēm bembapē. ⁹ Ngáne echēm

Sáŋ ádáá me, melemlem née mémpē rídáá nyé. Né-ó nyédii nyébê ne me âbel boŋ ríbbê rídəŋ nyé. ¹⁰ Nzé nyéhídé échêmbéndé, né mēbē rídəŋ nyé. Melemlem nê dóó ríhídéé mbéndé échē echem Sáŋ, adii adáá-’ε me. ¹¹ Nlānge nyé rímēn mésyāāl âbel nēn nyémpē nyéwôg nyaa e menyinge echē ríwogéé, rímēn menyinge mélôn-ne mbon. ¹² Echem mbéndé edii nēn, nyédəŋ nhóg ne aníní melemlem nēngáne rídáá nyé. ¹³ Nzé mod awédé á nló mí baáb, né alúmté edənge éche étómténé achab ámīn. ¹⁴ Nzé nyébele’ mekan míme rílánge nyé meé nyébel né nyédii ábēm besón. ¹⁵ Meéchāgēē nyé bembəledε ámpē, áyāle bembəledε béēbyē’ε mam míme echab sáŋ ábeléé. Boŋ ríchəgέé nyé meé ábēm besón áyāle nlánge nyé mam mésyāāl míme echem Sáŋ álánge me. ¹⁶ Nyéēpwedéé me, boŋ me-εé mpwedé nyé, nlóm-me nyé âbel mekan míme méchyáa e’pum e’ bwām. Nyaa é mekan échē ébē abé ne abé. Nzé nyébelé-’ε nē, echem Sáŋ ábē nyé kéchéé éche nyésédté á dīn ádēm. ¹⁷ Mmēn mam mésyāāl míme rílángeé nyé-óó, médii nēn meé, nyédəŋ nhóg ne aníní.”

Bad bé nkōŋsé békóó nyé

¹⁸ Yesuε ambád ábē bembapεε aláa aá, “Nzé nkōŋsé ríkóó nyé, nyébii nēn bán meé bésébpé akóó. ¹⁹ Nzé nyēmbé nēngáne bad bé nkōŋsé, né nkōŋsé météd nyé nēngáne ábē bad. Boŋ mpwedé nyé áfínté e bad bé nkōŋsé. Nyéēsaá bad bé nkōŋsé. Né-’aá ákáá boŋ nkōŋsé ríkóó nyé. ²⁰ Nyéwēmtεn ehób éche ménlāā’ε nyé meé ‘Mbəledε eetóméé eche sáŋ.’ Nzé bēmbané me á metake-tē né bēbané nyémpē á metake-tē. Nzé bēnhíd ádēm

ayáge né béhîd-te ádēn ámpē. ²¹ Bébēl nyé nímén mekan mésyā́l á yāl á dīn ádēm, áyāle béēbīi'ē ane awě alómé me. ²² Nzé menkēmpě boŋ nláá bó nímén mam, né nímab mbéb méenyínnedé. Boŋ bɔɔb, béewóó'ē nzom ké póg áyāle nímab mbéb. ²³ Kénzée awě akóó me, akóó kááŋne echem Sán. ²⁴ Nzé menkēmbel ndín é mam átínté echáb éche mod ampée éēbēlēē mbéd, né nímab mbéb méenyínnedé. Boŋ bɔɔb bényíne mekan mésyā́l míme núbélé, ké nê bédii békóó me, békóó-ε echem Sán. ²⁵ Nén ádé álóned e'yale ábe é'ténlédé á mbéndé echáb bán, 'Nzom ké póg enkēmbáá eche békóóné me.' ²⁶ Nwōŋgene ábíd wée Titée. Adii Edáádəŋ éche ébele' boŋ bad bésóŋtén mbále. Adé mébēē ne Titée mēlómē nyé mós, mós-aá álā́ nyé mam tŋgene me. ²⁷ Nyémpē nyéēhōb mam tŋgene me áyāle nyédé ne me se á mbooted.

16

¹ “Nlāŋge nyé nímén mésyā́l ábel boŋ nyéētinné mbíd. ² Bébídéd nyé á ndáb é mekáne. A mbále póndé ehúé' eche kénzée awě áwūū nyé áwēmtēnnē aá móbenle Dyóɔb. ³ Bébēl nímén mam áyāle béēbīi'ē echem Sán béēbīi'-aá me. ⁴ Nlāŋgé nyé nímén mam mésyā́l ábel boŋ nzé póndé epedé echě nímén mekan mébenladtē, nyéēkamtén bán menláá' nyé.

Nsán míme Edáádəŋ ébenlé

“Menkēnláá'é nyé nímén mekan á mbooted, áyāle membé ne nyé. ⁵ Boŋ bɔɔb, nkag wée mod awě alómé me. Ké nê, nyé modmod nyéesedteé me bánken 'Hée ékagké?' ⁶ Aláa ádé nílāŋgé nyé

mímén mekan ábélé ndutul elógé nyé á nlém-tê.
 7 Ne mbále, nlânge nyé nén meé, édé mbon nén bán ríke. Ayāle nzé meékii, né Nwōngene éepaá áwēn. Bon nzé nkii, mēlōmē nyé mó. 8 Ade ápéé, álūmēd bad bé nkōnsé nén aá mímab nsōn̄ten míme bēwánlé t̄n̄gene abel dé mbéb ne ábel mekan míme mēsáá méet̄n̄genéé. Bēēsōn̄tenéé-’ε nyaa echē Dyōb ákáadtéé. 9 Mmab nsōn̄ten méet̄n̄genéé t̄n̄gene mbéb, áyāle bēedúbpéé me. 10 Méet̄n̄genéé t̄n̄gene abel dé mekan míme mēsáá, áyāle nkag wée Titée, nyéenyín-naá me ámpē. 11 Méet̄n̄genéé t̄n̄gene nyaa echē Dyōb ákáadtéé, áyāle amaá nkamlene a nkōnsé akáad.

12 “Ndii nwóó ekud é mekan áláa nyé bon mímé mekan métom nyé áte. 13 Bon áde Edāád̄an é mbále épéé, ábēl nyēbíí mbále esyāál. Eehóbénné echē kunze chēn. Dyam áde bēlāā’é mó dōo áhōbpē, ālāā-’ε nyé mam míme mébenléd pónDé echē ehúé’ á’sō. 14 Achāgēd échēm edúbé ámín áyāle kéchéé éche áwógé áwēm chōo mó-’ε álāā’é nyé. 15 Kéchéé éche echem Sáj áwóó édii échēm. Nē dōo ákás̄ bon ríhōbē meé Edāád̄an étēd kéchéé éche ríhóbé, éláá nyé.”

Ndutul ɛ̄t̄m menyin̄ge

16 Héé Yesue ábádeé aá, “Mwāmp̄in mí pónDé nyéenyínné me ámpē, mwāmp̄in mí pónDé-’ε ámbid enē nyéenyín me.” 17 Dōo don̄ge dé be-mbap̄ee bēsēdtéé nhóg ne aníníí bánken, “Cheé áwémténé ahób, áláa syánē aá, ‘Mwāmp̄in mí pónDé nyéenyínné me ámpē, mwāmp̄in mí pónDé-’ε ámbid e nē nyéenyín me?’ Ahób-pe ámpē aá, ‘Ayāle nkag wée Titée.’ ” 18 Bēmbē bēsēdté bánken,

“Cheé áwémténé ahób, áhób aá, ‘Mwämpin ní pón dé?’ Séesõητενεέ dya m áde áhóbεέ.”

19 Yesue ammäd abii aá, béhede mó dya m aseded. Né-óó, anláá bó aá, “Dya m áde níhóbé meé, ‘Mwämpin ní pón dé nyéenyinné me ámpē, mwämpin ní pón dé-’ε ámbíd e nê, nyéēnyin me,’ dóo nyésedteé nhóg ne aníní-yε? 20 Ne mbále, nlânge nyé meé, nyéēchií, nyéléb-pε, boη nkõηsé méwōg menyin ge. Nyéēsudén, boη ní mē nsuden métim menyin ge. 21 Mmwaád awé ahede achyáá abelé ásuden áyāle eche pón dé e metake epedé. Boη nzé amaá achyáá abelé awóg menyin ge, áyāle moonyoη achyáádté á nkõηsé. 22 Nê dóo édíí ne nyé. Nyésüdné bõõb, boη mēnyin nyémpē. Ene pón dé ní mēn nlém mélõn ne menyin ge, modmod éehēnlé-’aá nyé ní mē menyin ge akoben. 23 Ade échē epun épreé, nyéesedédté me dya m dya m. Ne mbále, nlânge nyé nēn meé Titée äbē nyé kéchéé échē nyésédté á dñn ádēm.* 24 Kóõηne bõõb nyéēhēdnēé mó chõmchõm á dñn ádēm. Nyéhēden mó, nyéēküd ábel nēn ní mēn menyin ge mélõg mbon.”

Yesue atómé nkõηsé áte

25 Yesue ambád ábē bembapεε aláa aá, “Mbēnlédé ngan áláa nyé ekud é mekan. Pón dé ehúε’ echē méebenlédté ngan. Mélāā-’ε nyé mekan tãηgene Titée, nyaa echē nyésõηtēnnē. 26 Echē epun, nyéēhēdén mó kéchéé á dñn ádēm. Méetãgēn-naá mó aláa meé áwõηgen nyé, 27 áyāle Titée mwēn

* **16:23** Titée äbē nyé kéchéé échē nyésédté á dñn ádēm: donge á kálag áwóó Nzé nyésédté Titée kéchéé, äbē nyé chó á dñn ádēm.

adə́ə nyé. Adə́ə nyé áyāle nyêdə́ə me, nyêdúbpé-
'e bán mbídé áwē. ²⁸ Membíd wéé Titéé, nípē á
nkōṣé-te, bə́əb-pe ntədte nkōṣé, ntime ámbíd
wéé Titéé.”

²⁹ Héé abē bembapēé béhóbéé bán, “Ehóbe bə́əb
ngáne sésōṅtēnnē, weébēnládté ngan. ³⁰ Sēbíí bə́əb
bán ebíí mekan mésyā́l, éehednád-taá bán mod-
mod áseded we dyamdyam. Nén ábélé sêdúbpé
bán ebídé wéé Dyōb.” ³¹ Dóó Yesue ákwentanné bó
aá, “Nyêdúbpé bə́əb-ε? ³² Nyénone! Póndé ehúé',
emaá-ε ape, áde nyépāṅtēdtē áte. Mod téé atóm
mehélé wéé ábídé, nyétēdē mmēmpen. Boṅ ké nē,
meesaá mmēmpen, Titéé adé ne me. ³³ Nlāṅge nyé
nímén mekan ábēl nén nyébê nsan abé ádē nyédíí
ne me. Nyéékūḍ metake á nkōṣé-te boṅ nyéwēd
nlém á abum. Ntómé nkōṣé áte.”

17

Yesue akánnédé eche yāl

¹ Ade Yesue ámaá nímén mekan mésyā́l ahób,
dóó ánóné ámín boṅ áhōbē aá, “A-Tê, póndé emaá
ape. Lúmed bad ehúmé échē awoṅ Mwän, ábēl
nén awoṅ Mwän mómpē álúmed ehúmé échōṅ.
² Ebágé mó kunze ákamlēn moosyā́l, ábēl nén ábe
bad bésyā́l ábe ebágé mó alongé áde déemaá'.
³ Alongé áde déemaá' ádíí nén bebíí we, mmōn
awē edé Dyōb á mbále, ne ábíí Yesu Krīstə́ə, awē
élómé. ⁴ Mbídté échōṅ ehúmé áwed á nkōṣé
amad áde nímádé nsón níme ebágé me. ⁵ Bə́əb-
pə́ó a-Sáj, bídéd échēm ehúmé áwed, wéé mmōṅ
édíí. Melemlem mé edúbé níme ménwōṅgē ne we,
nkōṣé ídē ahób bán níbootad.

Yesue akánnédé ábē bembapεε

6 “Mbélé bad bé nkõjsé ábe ébágé me bébíi wε. Bébédée ábõη, wembε me bó, bébélé-’ε ngáne ehóbe wεé bébel. 7 Bébíi bõõb bán kéchéé éche ébágé me, ébíde áwõη. 8 Nlángé bó mam mésyāāl míme élánge me wεé rílaa bó, bédúbpé-’ε míme mam. Bébíi ne mbále bán áwõη dõõ mbíde, bédúbpé-’ε bán wε-εé elómé me. 9 Nkânnad bó. Meekânnádté bad bé nkõjsé. Boη nkânnad bad ábe ébágé me, áyāle bédii ábõη. 10 Bad bésyāāl ábe bédé ábêm bédii ábõη, ábõη-’ε bésyāāl bédii ábêm, béhídté-’ε échêm ehúme áwed. 11 Bõõb-põõ, mwāmpīn mí pónde méebáá á nkõjsé-te ámpē. Boη bédii bédé á nkõjsé-te. Nhyag áwõη. Titée awē Asáá, káá bó á ngíne e dīn ádõη, dīn áde ébágé mé. Ngíne echē ébágé me ábel nén bēbē mod nhóg, melemlem ngáne sóo-’ε ámpē dédíí mod nhóg. 12 Ade mbédé ne bó, menkáá bó á ngíne e dīn ádõη, dīn áde wēmbεé me.* Nkǎngé bó, bó mod ké nhóg-ke eebõõ’é étõmεé mod awē êmmádté abé bán ábõõ ábel boη ébenled ngáne éténlédé á kálag e Dyõb. 13 Bõõb-põõ, nhyag áwõη. Nhóbe-’ε mímén mekan ngáne ndii ríde á nkõjsé ábel boη mímb menyīnge mélõn mbon, melemlem ngáne mímēm-me mélóné mbon. 14 Nlángé bó mam mésyāāl míme élánge me wεé rílaa bó. Bõõb-põõ bad bé nkõjsé békáá bó áyāle béesaá bad bé nkõjsé ámpē, melemlem ngáne me ámpē méesaá mod a nkõjsé. 15 Meehóbéé meé ehúð bó á nkõjsé-te, boη nhóbe’ meé ékæ’ bó ábel boη Mod e Ebébtéd

* **17:12** Menkáá bó á ngíne e dīn áde wēmbεé me: donje a kálag awóó á ngíne e dīn ádõη ménkáá bad ábe ébágé me.

eébēlē' bó mbéb. ¹⁶ Béesaá bad bé nkõjsé melemlem nêngáne méesaá mod a nkõjsé. ¹⁷ Benléd echon mbále ábel bon béhel we abele. Echõy eyale édé mbále. ¹⁸ Nlómé bó á nkõjsé-te melemlem nêngáne wémpē wénlõmmē me á nkõjsé-te. ¹⁹ A etútú échâb membě echem yál ábele we ábel bon bõmpē bébe échab yál ábel bon békon we abele.

Yesu akánnédé bad ábê béedúbé mó bésyāā

²⁰ “Meekánnádté ábēm bembapεε bēnpεn bon nkánnad káõne bad ábe bédúbpē me áyāle mam míme bēwógé áwāb. ²¹ Nkánne' meé bó moosyāál bēbē mod nhóg. A-Tê, bó moosyāál bēbē mod nhóg ne sóo, melemlem nêngáne édíí ne me, me-'ε mbé ne we. Bēbē mod nhóg ábel nén nkõjsé rídúbe bán we-εé elómé me. ²² Ehúmé éche ébágé me, me-'ε mbagé bó. Mbagé bó ábel bon bēbē mod nhóg melemlem nêngáne sóo dédíí mod nhóg. ²³ Ndé mod nhóg ne bó, we-'ε edé mod nhóg ne me. Nén déběl békõn mod nhóg abé. Békon mod nhóg abé ábel bon nkõjsé mbíi bán we-εé elómé me, bēbíi-'ε bán edáá bó melemlem nêngáne édáá me. ²⁴ A-Tê, ebagé me bó, bēbē wéε rídíí, ábel bon bényín echēm ehúmé. Wembě me ehúmé áyāle wendān me se á mbooted mé nkõjsé. ²⁵ A-Tê, we-εé ebele mam míme mėsáá. Nkõjsé méebíí'ε we, bon mbíí we, ábén-ne ámpē bēbíí bán we-εé elómé me. ²⁶ Mbelé bēbíí we, mēbēl-le ámpē ábel nén edānje échě édáá me ébē bó áte, me-'ε ámpē mbē ne bó.”

18

Békóbé Yesu

(Mat 26.47-56; Mak 14.43-50; Luk 22.47-53)

¹ Ade Yesue amáá akáne, bóobe ábē bembapεε bēnhidé, béchābē mwă edíb a Kidron ámīn. Nzag embé áhed, bénsāl áwēd-te. ² Judase, ntúré awē Yesue ambíí ádē abwóg á hōm, áyāle Yesue ne ábē bembapεε bēmmētén aladen áhed. ³ Né-ǎǎ, Judase antómén echon é sánze ne bembaledε bé Ndáb-e-Dyōb ábe beprise bémbáá ne Befarisia bēnlōmmē, békē wée Yesue ábédé. Abē bad bēnchōd e'kag, bēwálé e'trúkánj ne bwēm é' nzum. ⁴ Yesue ammăd mam mésyāāl míme mébenléd ne mó abíi, ké nê, ambídéd yāl áwed, ásēdēd bó aáken, “Nzé nyéhedeé?” ⁵ Bēnkwentén mó bán, “séhede Yesue, mod a dyad á Nazaret.” Yesue ankwentén bó aá, “Me-éé ndé mó.” Judase ntúré awē Yesue ambé áhed ne ábē bad. ⁶ Ade Yesue áhóbé aá, “Me-éé ndé mó,” bēntimén mbíd, békwe ásē. ⁷ Hē dōo Yesue ásedtéé bó ámpē aáken, “Nzé nyéhedeé?” Bēnkwentén bán, “Yesue a dyad á Nazaret.” ⁸ Héε Yesue ákwentanné bó aá, “Nlángé nyé meé, me-éé ndé mó. Né-ǎǎ, nzé nyéhede me, nyétēdē ábén bad ábe bédé ne me, békag.” ⁹ Nén dēmbenléd álóned e'yale ábe ánhōbpē aá, “A-Sánj, átíntē e bad ábe wēmbéé me, meebódeé ké nhóg.” ¹⁰ Simōn Petro anwálé nkwaté. Héε ádólé míme nkwaté bonj átōmtē', ásēlē etúu é ekáá é mbáá é mbaledε awē prise ambáámbáa. Ane mbaledε abédé dīn bán, Malkuse. ¹¹ Yesue anláá Petro aá, “Timéd nkwaté á abám. Nédē, meetēngeneé metuné míme echem Sánj átíínédé me akud-ε?”

Békééné Yesue wée Anase

¹² Héε échē echon é sánze ne awáb mod ambáá nchoo ne bembaledε bé bad bé Israel békóbé Yesue béhanj mó. ¹³ Bénsēbē mó akεen wée Anase.

Anase abédée sán-kalé awě Kaifase awě abédé prise ambáámbáa nímê mwě. ¹⁴ Kaifase ne, mó ambě bad bémháá bé Israel elébé aá ébóó bán mod nhóg áwê á nló m bad bésyāāl.

Petro abáá Yesue á yāl

(Mat 26.69-70; Mak 14.66-68; Luk 22.55-57)

¹⁵ Simōn Petro ne mbapēē ampée behídé'áá Yesue. Prise ambáámbáa ambíí ane mbapēē, né-óó ane mbapēē ansól eyáde éche prise ambáámbáa wée bēnsōlēnnē Yesue. ¹⁶ Petro pen anlyǎg á mmwe mé e'ké. Dóó ane mbapēē awě prise ambáámbáa ámbíí'é átímé ámbíd á mmwe, ákālēn ngōndéē echē enōné'áá mmwe boŋ ásōltē Petro á eyáde-tē. ¹⁷ Ene ngōndéē ansēdéd Petro aáken “Kíné wēmpē weesaá mbapēē nhóg awě ane mod-ē?” Petro ankwentén mó aá, “Aáy, meesaá.” ¹⁸ Bōob-póó, ahéb démbē. Né-óó, bembāledē ábe prise ambáámbáa ne bembāledē bé Ndáb-e-Dyōb bēnkonéd muú betyéém áhed bēwāle'. Petro mómpē ambé áhed, atyéém áwālē muú.

Prise ambáámbáa akáadte Yesue

(Mat 26.59-66; Mak 14.55-64; Luk 22.66-71)

¹⁹ Prise ambáámbáa esēdté'áá Yesue tǎngene ábē bembapēē ne ádē ayáge. ²⁰ Yesue ankwentén mó aá, “Mam mésyāāl níme nílǎngé'áá bad nhóbé'áá mó á nhéné. Ayáged ádēm ásyāāl'-ē, abédé á Ndáb é mekáne ne á Ndáb-e-Dyōb wée bad bé Israel bésyāāl bēladnéé. Meéhóbéé'-ē dyamdyam á kuntē. ²¹ Cheé-ō ésedtéé me ámpē. Sedéd bad ábe bēnwōg mam níme nílǎngé bó. Bébíí mam níme nílǎngé.” ²² Ade Yesue áhóbé nê, mbāledē nhóg ambōm mó abén ahób aá, “Chán éhele éhōbē' nê

wée prise ambáámbáa?” ²³ Yesue antimtén mó aá, “Nzé nhóbé dyam áde déetâhgene, ehób dó moosyáál áwôg. Boη nzé édé bán nhóbé dyam áde átâhgené, cheé ékáá boη ébomé me?” ²⁴ Dóo Anase áhóbé aá, béκεεν Yesue wée Kaifase, prise ambáámbáa. Yesue ambé abé á mehaη.

Petro abáá Yesue á yāl ámpē

(Mat 26.71-75; Mak 14.69-72; Luk 22.58-62)

²⁵ Bóob-póó, Simōn Petro ambé atyéém áhed áwālē muú. Héε bad ábe bémbē áhed básdtéé mó bán, “Kíné wémpē weésáá mbapeε nhóg awē ane mod-ε?” Petro antâη aá, “Aáy, meésáá.” ²⁶ Mbáledε awē prise ambáámbáa nhóg, mwānyâη móo Petro ánsēnlē etúu, anchágéd ehób ámīn, aláá Petro aá, “Kíné meenyíneé nyúmō á nzag-tē-yε?” ²⁷ Petro antâη ámpē. Ábwōg-ábwōg, nchóm a kúb antōη.

Payledε akáádté Yesue

(Mat 27.1-2, 11-14; Mak 15.1-5; Luk 23.1-5)

²⁸ Bad bé Israel bēnhidnéd Yesue á ndáb wée Kaifase békéēn mó á eyáde e nkamlεε ambáá. Nén ábédé epog é mbwεmbwε. Bēn bēnkēnsónlé á ndáb-te ábán nén béenyínnád mbinde á'sō é' Dyōb * ábel bédyē Ngande e Nnyíme-ámīn. ²⁹ Né-óó, Payledε nkamlεε ambáá a bad bé Roma, ambíd e ebwóg áke atán bó, ásedtē bó aáken, “Awusé áhéé nyéhóbé bán anén mod abelé?” ³⁰ Bēnkwentén mó bán, “Nzé anén mod enkēmbé ebébtéd é mod, né séēbagéé mó áwōη mekáá.” ³¹ Payledε anláá bó

* **18:28** Bad bé Israel béndūbē nén bán nzé mod aslé á ndáb e mod awē eésē mod a Israel, né awógté yāl mbinde. Ne bó, enén ndīn e mod ebágáá mbinde á'sō é' Dyōb epun saámbé. Enén pónde esyáál eéhele'aá-se adyé Ngande e Nnyíme-ámīn.

aá, “Nyé bĕn nyétĕd mó, nyébenled mbéndé echĕn nyékáad mó.” Hĕe bad bé Israel bĕlāngĕé mó bán, “Séewóó’ĕ kunze áwúu mod.” ³² Nĕn dĕmbĕnléd álóned e’yale ábe Yesue ánhōbpĕ álúmed nyaa e kwééd eche áwĕĕ. ³³ Payledĕ ansól á ndáb-te ámpĕ, áchāg Yesue, ásĕdĕd mó aá, “Wĕ-ĕé edé kĕĭ e bad bé Israel-le?” ³⁴ Yesue ankwĕntĕn aá, “Mmōn-ĕé ehóbe nĕ ngé bad bĕmpĕe bóo bĕlāngĕ wĕ mam á yāl echĕm?” ³⁵ Payledĕ ankwĕntĕn aá, “Ndé mod a Israel-le? Abōĭ bad ne beprise bĕmbáá bóo bĕbágé wĕ áwĕm mekáá. Cheé ébĕlé?” ³⁶ Yesue ankwĕntĕn aá, “Mmĕm nkamlĕn méesaá á nkōĭsé wĕn. Nzé mĕm nkamlĕn mémbĕ á nkōĭsé wĕn, né ábĕm bembāledĕ bĕwān, ábĕl nĕn bad bĕebagé mĕ á mekáá mé bad bé Israel. Boĭ mĕm nkamlĕn méesaá mé nkōĭsé.” ³⁷ Dóo Payledĕ ásĕdteé mó aá, “Nĕdĕ edé kĕĭ-ĕ?” Yesue ankwĕntĕn aá, “Wĕ-ĕé ehóbé wĕé ndé kĕĭ. Nzōm echĕ ekáá boĭ béchyáá mĕ, mĭpĕ á nkōĭsé wĕn, edĭi ábĭd mbōĭ e mbále. Mod ké ahéé awĕ adé mod a mbále awóglan mĕ.” ³⁸ Payledĕ ansĕdéd mó aá, “Cheé edé mbále?”

Bán Yesue atōĭgéné awé

(Mat 27.15-31; Mak 15.6-20; Luk 23.13-25)

Ade Payledĕ amáá mó asĕded nĕn, ambĭd á ebwóg ámpĕ akĕ atán bad bé Israel, anláá bó aá, “Meekóbnĕé anĕn mod awusé ké ahóg áde méhōbpĕ meé bĕwúu mó. ³⁹ Boĭ nyĕwóó elem nĕn bán, ntōĭgéné nyé mod a mbwōg nhóg abĭdted á pónDé e Ngande e Nnyĭme-ámin. Nyĕdāó bán mbĭdted nyé kĕĭ e bad bé Israel-le?” ⁴⁰ Bĕnkwĕntĕn mó ne e’saad bán, “Aáy! Séĕhĕdĕĕ mó. Bĭdtéd sé Barabasĕ.” (Barabasĕ abĕdé-’ĕ nchĭb ambáá.)

19

¹ Dóo Paylede áhóbé aá béke bébom Yesue. ² Sánze éntēd ngen é mechă bəlónj ekóté éche émbē née ekóté é kâñ, béhē mó chό á nló, béhé-'ε mó mengombe míme méyage' á yǎl, míme méwagné mengombe mé kâñ. ³ Bésídté'áá mó benben, béhōbē bán, "A kâñ e bad bé Israel, edúbé ébê ne we." Bébómé'áá mó káñne mebén. ⁴ Paylede ambíd á ebwóg ámpē, aláá ábê bad aá, "Nyénone', mbídtaad nyé mó á ebwóg, ábel nén nyébii bán, meekóbneé mó awusé ké ahóg." ⁵ Né-óó, Yesue ambíd á ebwóg ne ekóté e mechă á nló, megombe míme méyage' mó-'ε mébé mó á yǎl. Héε Paylede álângeé bó aá, "Nyénone' awedé mod-e nén!" ⁶ Ade beprise bémbáá ne bembalede bé Ndáb-e-Dyōb bénýiné mó, bēmbbootéd abón bán, "Bomé mó á awóg! Bomé mó á awóg!" Paylede anláá bó aá, "Nyé bēn nyétēd mó, nyébome mó á awóg, áyāle meekóbneé mó awusé ké ahóg." ⁷ Abé bad bēntímtén Paylede bán, "Sēwóó mbéndé echē ehóbe nén bán atánjéné awé áyāle ahóbé aá módii Mwän a Dyōb."

⁸ Ade Paylede áwógé nén, mbwóg mēnnabé mó akób. ⁹ Antím ambíd á eyáde-tê ámpē, ásēdēd Yesue aá, "Héé ébídé?" Bon Yesue enkēnkādénné mó. ¹⁰ Né-óó, Paylede anláá mó aá, "Weéhēdēē me akwenten-ε? Weebii'ε nén weé nwóó kunze áhób meé béchene we, nwóñ-'ε kunze áhób meé bébome we á awóg-ε?" ¹¹ Yesue ankwentén mó aá, "Weewóó'ε kunze ké póg ámín echēm ésebán Dyōb ábágé we ene kunze. Né-óó, mod awē abagé me áwōñ mekáá abelé mbéb míme ítómténé achab ámín." ¹² Ade Paylede áwógé nē anhēd nzii áte

Yesue, bonj ábê bad bénhē e'saád bán, “Nzé etědté anén mod né weesaá nsón awě Kaisεε. Kénzée awě ahóbé aá, módē kēη né atēηgan Kaisεε.”

¹³ Ade Payledε áwógé nén, ambídén Yesue á ebwóg, ádyēē atii dé nkamlεn. Adē hōm wée āndyεé'é béchágé'aá dó bán, Eyáde éche bénábnédé Meláá. Á ehób é Hibru béchəge bán, Gabata. ¹⁴ Bəəb-pəə, nén ábédé á epun é mbonşén é Ngande e Nnyíme-ámín, dyam kəd. Payledε anláá ábê bad bé Israel aá, “Echen kēη chō nén!” ¹⁵ Abê bad bénhē e'saád bán, “Wúú mó! Wúú mó! Bomé mó á awəg!” Héε Payledε ásedtεé bó aá, “Mbome echen kēη á awəg-ε?” Beprise bémbáá bēnkwentén mó bán, “Séewóó'é kēη empée étōmεé Kaisεε.” ¹⁶ Dóə Payledε ábágé Yesue áwab mekáá ábome mó á awəg.

Bébómmé Yesue á awəg

(Mat 27.32-44; Mak 15.21-32; Luk 23.26-43)

Né-əó, bēnhidnéđ Yesue. ¹⁷ Yesue mwēn ampém ádē awəg bootya á dyad-tē ákēēn dó hōm áde béchəgeé bán, “Hōm dé Ebəngél é Nló,” áde béchəgeé á ehób é Hibru bán Golgota. ¹⁸ Ahed-taá bēmboméé mó á awəg. Bēmbomé bad bébe bémpēe á awəg áhed, nhóg pəd póg, aníníí-ε pəd eníníí, Yesue abé átínté.

¹⁹ Payledε antēl á abámbé aá, “Yesue, mod a dyad á Nazaret, kēη e bad bé Israel,” abádé á awəg á nló-mín wée Yesue. ²⁰ Wée bēmboméé Yesue á awəg démbē benben ne Jerusalem. Né-əó, bad híin bēnlāη chōm éche bēntenlé. Chōm éche āntenlé, antel chó á ehób é Hibru, átēl é ehób é Latin, ne é ehób é Grikia. ²¹ Beprise bémbáá bēnlāā Payledε bán, “Wεétēlē wée ‘Kēη e bad bé Israel,’ tēl wée,

‘Anén mod ahóbé aá, με-εέ ndé kâη e bad bé Israel.’
” 22 Payledε anláá bó aá, “Chõm éche rítélé mmaá atel.”

23 Ade sánze é máá Yesuε abome á awõg, béntēd éche mbóté, békabté d chó áte monge ménin, bó mod té atéd akab ahóg. Béntēd káñne mbóté eche béhágkē áte. Ene mbóté bēnkēmbaá’é chó hõmhõm. Embé bootya ámin âpe ásē enkēnwõngé mbom. 24 Héε bélângeé nhóg ne aníníí bán, “Syánē deésālē chó. Désid mbambú ányín mod awē átēd chó.” Nén dēmbenléd álóned e’yale ábe é’ténlédé á Kálag e Dyõb nén bán,

“Bēn ne bēn bēnkāb échēm mbóté.

Bēnsíd-te mbambú ákab nímēm nsob.”

Né-ᵛᵛ, nē dᵛᵛ échē sánze êmbenlé. 25 Yesuε nyaá, nyaá mwānyan, Maria awē abédé Klopase mwaád ne Maria Magdalene béntyēēm benben ne á awõg áde Yesuε. 26 Ade Yesuε ányiné nyaá ne mbapeε awē ádᵛᵛ bétyéémé áhed, anláá nyaá aá, “A-nyan, mwān wε ne.” 27 Héε álângeé ane mbapeε mómpē aá, “Nyoó ne.” Bootya ene pón dé ane mbapeε antéd Yesuε nyaá, átimēn mó áwē ndáb.

Yesuε awédé

(Mat 27.45-56; Mak 15.33-41; Luk 23.44-49)

28 Ambíd e nê, Yesuε annyín aá mekan mésyāāl mémáá. Alóned-te ngáne éténlédé á Kálag e Dyõb anhób aá “Píd ekóbé me.” 29 Kúmbe embé áhed, ebéntéd é mīm énlōg áwēd-te. Né-ᵛᵛ bēntᵛᵛ dé kuchá á ebéntéd é mīm-tē wê, bésōm á ntõη ní ngen e hísab, béhē mó á nsal. 30 Ade Yesuε ámwédé ebéntéd é mīm chē, anhób aá, “Emáá.” Héε á mógé nló, awé-’ε.

Bésóó Yesuε akon á aheb

³¹ Bɔɔb-pɔɔ, échê epun ébedé Mbwe mé mbonŝén mé mbwe-mé-nkóme-áte. Bad bé Israel-le béehede'aá bán ndim núbé núbê á awɔg á mbwe-mé-nkóme-áte, tanje ngáne échê epun é nkóme áte étomtēnnē edúbé abé. Né-ɔɔ bēntān Payledε bán, áβε bó kunze ábóg bad áβε bébómmé á awɔg mekuu ne áhúd bó á awɔg. ³² Né-ɔɔ, échê sánze ênkě ébóg mekuu míme bad áβε bēmboméé bóɔβε Yesue á awɔg. Bēnsēbē míme nhóg abóg, bébóg-ke míme aníníí. ³³ Bon áde bépédé wée Yesue bēntān née áamá awé. Né-ɔɔ, bēnkētɔgēnné mó mekuu abóg. ³⁴ Ké nê, sánze póg enson mó akon á aheb. Abwɔg-ábwɔg mekií ne mendíb bēmbíd. ³⁵ Mod awě annyín née mímén mekan mébénlédé, abídé mbón, eche mbón edé-'ε mbále. Abíí nén aá, mókale' mbále, ahóbe-'ε mímén mam ábel nén nyémpē nyédúbe. ³⁶ Mmén mam mébénlédé álóned e'yale áβε é'ténlédé á Kálag e Dyɔb nén bán, "Béebógké ehid échē ké ehóg." ³⁷ Eténlédé á kálag e Dyɔb ámpē nén bán, "Bénñ ane awě bésóó akon."

Bélimmé Yesue

(Mat 27.57-61; Mak 15.42-47; Luk 23.50-56)

³⁸ Ambíd enê, Joseβε awě ambíd á dyad á Ari-matia, anláá Payledε aá, áβε mó kunze áted ndim míme Yesue. Joseβε abédée mbapεε awě Yesue, bon énkēmbídédte yál áwed áyāle abáá'áá bad bé Israel. Payledε ambě mó kunze áted ndim míme Yesue. Né-ɔɔ, ankě Yesue ndim atéd. ³⁹ Nikodemuse awě ansébé Yesue akε dé anyín nkuu, bó Joseb bēnkě. Bédêkě anwálé mekúle míme bēnabnadté

ndim mímé bébénlé Mía ne Alos.* Adê dyǒg ábédé dyam móom mé kilo meláán ne kilo étáan. ⁴⁰ Béntēd ndim míme Yesue, békāan mó mbóm ne míme mekúle. Nén dǒo elem é bad bé Israel áboḡsen ndim émbēē. ⁴¹ Bǒob-pǒó, nzag embé wéē bēnwū'é Yesue. Soḡ e ekóólé ebédé á nzag-tē wê, echē bēnkēmpaá ndim ké nhóg abane áte. ⁴² Né-óó, ngáne échē epun ebédé mbwε mé mboḡsén mé mbwε-mé-nkóme áte, ene soḡ-ε ebé benben, bēmbané Yesue ndim áwēd-te.

20

Yesue apuúdé

(Mat 28.1-8; Mak 16.1-8; Luk 24.1-12)

¹ A Sǒndé, epǒg é mbwεmbwε, áde ehíntén émbēē ébé, Maria Magdalene ankě á soḡ wéē bēnlímēē Yesue. Ade ápédé áhed, antán née béhúdé aláá áde bēnkǒlennē nsəl rí soḡ. ² Héé átómé mehélé, boḡ áke atán Simǒn Petro ne mbapεε ampée awě búmǒ bébédé. Ane mbapεε abédée mbapεε awě Yesue ándǒngé. Dǒo Maria álǎngéé bó aá, “Béhúdé Sǎngwéé ndim á soḡ-tē, séebíi-áa wéε bébánné mó.” ³ Dǒo Petro bó ane mbapεε béhídté boḡ békǎg á soḡ. ⁴ Bó moosyǎál bényǎgté'áá, boḡ mbapεε aníníi anyǎgté'áá tómaa Petro. Né-óó, ansébé ape á soḡ. ⁵ Anwúlén ásē ásad dǐd á soḡ-tē, anyín mbóm éche bēnkaánné Yesue, boḡ enkēnsónlé á soḡ-tē. ⁶ Simǒne ahúé'áá mó ámbǐd, apédé-'aá pεén asól-ε á soḡ-tē. Antán mbóm éche bēnkaánné Yesue áhed. ⁷ Antán-ne abad áde bēnkaánné Yesue nló. Adê abad déēbédéé hǒm ahóg ne mbóm, déndǒǎn

* **19:39** Alos: Abédée mekúle míme bébénládtáá á nabned ndim.

áte pɛd póg. ⁸ Hée aníní mbapɛɛ awě ansébé apɛ á son mómpɛ ásólé áwɛd-te. Annyín ábê bwɛm, adúbé-'ɛ. ⁹ Ké nê, bɛnkênsónténné chòm éche éténlédé á Kálag e Dyõb nén bán Yesuɛ atáŋgéné apuu. ¹⁰ Ambîd é nê, ábê bembapɛɛ bɛntĩm ámbîd á ndáb.

*Yesuɛ alúmté Maria Magdalɛnɛ yǎl
(Mat 28.9-10; Mak 16.9-11)*

¹¹ Bɔɔb-pɔɔ Maria anlyǎg á nsəl ní son, áchyɛɛ'. Ade áchyɛɛ' é nê dɔɔ áwúnlé ásɛ, bon ásadé díd á son-tê. ¹² Asad áde ásádé díd, annyín ángel ébɛ. Echê ángel énhɛ e'púpe é' mbóté, édyɛɛ wɛɛ bɛnnaádté ndim míme Yesuɛ. Nhóg andyɛɛ á pɛd e nló, aníní-'ɛ á pɛd e mekuu. ¹³ Echê ángel ênsɛdéd Maria bán, "Á-mmwaád, cheé échyɛ' é?" Anláá bó aá, "Nchye' áyǎle bétédé ndim míme awem Sǎŋgwéé, meebii-'áa wɛɛ bébánné mó." ¹⁴ Ade ámáá ahób nê, ankunnéd, anyín nɛɛ mod átyéémé áhed. Ane mod abédɛɛ Yesuɛ bon enkêmbíí' é aá Yesuɛ mó adé. ¹⁵ Yesuɛ asɛdéd mó aá, "Á-mmwaád, cheé échyɛ' é? Nzéé éhɛdɛé?" Maria anwémten aá mod awě abele nsón á nzag-tê wê mó adé. Né-ɔɔ, anláá mó aá, "A-sǎŋ, nzé wɛ-ɛɛ etédé mó ndim, eláá mɛ wɛɛ ébánné, ábel bon níke nítéd mó." ¹⁶ Hée Yesuɛ áchɛgɛé mó aá, "Á-Maria!" Dɔɔ Maria ákúnné yǎl áwɛ bon áhóbé á ehób é Hibru aá, "Rabóni!" (awě adé nén bán, "Meléede"). ¹⁷ Yesuɛ anláá mó aá, "Weésítán mɛ, áyǎle meétíméé ámbîd wɛɛ Titɛɛ. Bon kǎg wɛɛ ábɛm bembapɛɛ, ábɛm baányan, éláa bó wɛɛ, ntime' ámbîd wɛɛ echem Sǎŋ, awě adé kóŋne echen Sǎŋ. Mó adé Dyõb ádɛm, abé-'ɛ ádɛn." ¹⁸ Né-ɔɔ, Maria Magdalɛnɛ ankě, aláá bembapɛɛ aá,

mónyīnē Sánḡwéé. Anláá-’ε bó mam mésyā̄l níme álánḡé mǒ.

Yesue alúmté abē bembapεε yǎl

(Mat 28.16-20; Mak 16.14-18; Luk 24.36-49)

¹⁹ Echê epun é Sôndé chên, ngukél, bembapεε ábe Yesue bēnladén áte á ndáb-te bépēn-ne ekob áyāle bébáá’áá bad bé Israel. Yesue ampě, atyéém átíntê echâb, aláá bó aá, “Nsaḡ mǐbê ne nyé.”

²⁰ Ade áamáá ahób nê, anlúmed bó mímē mekáá, alúmed-te bó aheb. Bembapεε bébédé menyīḡe bwâmbwam ânyín Sánḡwéé. ²¹ Dóo Yesue álánḡéé bó ámpē aá, “Nsaḡ mǐbê ne nyé. Ngáne Títéε álómé me, melemem nê dóo mémpē rílómeé nyé.”

²² Ade áamáá ahób nê, anhébé bó peme, aláá-’ε bó aá, “Nyékob Edǎǎdǎḡ éche Esáá. ²³ Kénzée awě nyélágséné mbéb, né níme mbéb ríkúdé alagsen. Kénzée-’ε awě nyéelagsénéé mímē mbéb, né méekudéé alagsen.”

Yesue alúmté Tǎmase yǎl

²⁴ Tǎmase mbapεε nhóg átíntê e bembapεε dyôm ne bébe ábe Yesue, awě béchágé’áá bán Nhéd, enkēmbáá ne baáb áde Yesue ápédé. ²⁵ Né-óó, áde ahúú baáb bēnlāā mǒ bán, “Sēnyíne Sánḡwéé.” Boḡ anláá bó aá, “Esebán rínyíne mebaḡ níme bēmbomée mǒ tǎne á mekáá boḡ rísōm-me e’mii á mebaḡ-tê áwed, mǐbīd-te ekáá áwē aheb, méedúbéé mbéd.”

²⁶ Ambīd e e’pun waam, bembapεε bēnladén áte á ndáb-te ámpē. Tǎmase mómpē ambé áhed. Bēmpēn e’kob, boḡ Yesue ampě, atyéém átíntê echâb. Anláá bó aá, “Nsaḡ mǐbê ne nyé.” ²⁷ Héε álánḡéé Tǎmase aá, “Sǎm e’mii á mebaḡ hén. Nǎné’

me mekáá, éhyene-'ε ekáá, ébid me chó á aheb. Sóg mod abé awě eedúbpé', dúbé!" ²⁸ Tɔmasε ankwentén mó aá, "A-Sáá awêm, a-Dyöb ádêm." ²⁹ Yesue anláá mó aá, "Saá áyāle ényíne me dóó édúbpé-ye? Nnam ne bad ábe béenyíne boŋ kénê, bédúbe."

Nzəm echě ekáá boŋ bétéle' enén kálag

³⁰ Yesue amběł ekud é menyáké émpēe éche ábē bembapεε bémbēē ásē éche béeteleé á kálag-tē wén. ³¹ Boŋ nímén mésyāāl méténlédé ábel nén nyédúbe* bán, Yesue mó adé Ane-awě-Béwógté, Mwān a Dyöb. Nzé nyédúbpé-'ε mó, né nyékudé alongé áde déemaá' á dīn ádē.

21

Yesue alúmté abē bembapεε yāl ámpē

¹ Ambíd e nímén mésyāāl, anlúmed ábē bembapεε yāl ámpē á nkin mé edib é Tiberia. Nyaa echě ánlūmédtē bó yāl ebédée nén, ² epun ehóg Simōn Petro, Tɔmasε (awě béchágé'áá Nhéd), Nataniēle (awě ambíd á dyad á Kana á mbwóg e Galilia), bán ábe Zebediε, ne bembapεε ábe Yesue bémpēe bébe, bēnladén hōm ahóg. ³ Héε Simōn Petro álāngéé bó aá, "Nkag súu akób." Bēntimtén mó bán, "Sémpē séēhíd wε." Né-óó, bēnhidé béke bésól á bǎle-tē. Boŋ nímē nkuu nsyāāl bēnkēnkóbpé chōmchōm.

⁴ Ade bīn é'bóótédé akéle, Yesue antyéém á nkin mé edib. Boŋ ábē bembapεε bēnkēmbíí'é bán mó adé. ⁵ Dóó Yesue ásedtéé bó aá, "A-běd,

* **20:31** Nyédúbe; donje á Kálag dé e'só awóó nyébê nyédúbe.

nyéēkōbēē chōmchōm-ε?” Bēnkwentén mó bán, “Aáy, séēkōbēē.” ⁶ Anláá bó aá, “Nyébwēm mbínzé á pēd e ekáá é mbáá é bǎle, nyéēkōb.” Né-ǎó, bém̄bwēm mbínzé ene pēd. Bēnkēnhēnlé ene mbínzé adol áyāle sūu émbē áwēd-te bwāmbwam. ⁷ Dóó mbapεε awē Yesue ândəŋgé áhóbéé aá, “Sáŋgwéé mó adé!” Awóg áde Simōn Petro áwógé bán, Sáŋgwéé mó adé, anhé megombe á yǎl (áyāle anhūd bwēm á yǎl). Dóó áhébé á edīb-te. ⁸ Boŋ ábíní bembapεε bēmpǎ á nkin á bǎle-tē, bédolé mbínzé. Ene mbínzé enlōn ne sūu. Wéε bém̄bidēnnē bǎle ápe á nkin dénkēnchabpé, ábédé dyam mbwókel e méta póg. ⁹ Ade bépédé á nkin bēntān muú mé mekāŋled. Sūu ébédé áwed ámin ne ewele. ¹⁰ Yesue anláá bó aá, “Nyéhyεene’ donge á sūu áde nyékóbé bǎb.” ¹¹ Né-ǎó, Simōn Petro ansól á bǎle-tē, ádol ene mbínzé á nkin. Sūu émbáá énlōn ene mbínzé áte. Ebédé mbwókel móom métāan ne éláán. Kénεε echē sūu émbuú’é áte, ene mbínzé enkēnsaléé. ¹² Yesue anláá bó aá, “Nyéhyε nyédyê ndyééd.” Abē bembapεε bó modmod enkēnchu’é mó asēded aáken, “Nzé-módé edíí?” Bém̄bī bán, Sáŋgwéé mó adé. ¹³ Dóó Yesue átédé ewele boŋ ábagé bó. Ambēl melelem ne sūu. ¹⁴ Nén ábédé ngen echē élónténé éláán, echē Yesue álúmté ábē bembapεε yǎl á pónde echē ámáá apuu.

Yesue asēdté Petro ké adáá mó

¹⁵ Ade bémáá ndyééd adyé, Yesue asēded Simōn Petro aá, “A-Simōn, mwǎn a Jōn, edáá me tómaa ábén bembapεε-yε?” Simōne ankwentén aá, “Eε, a-Sáŋ, ebíí wéé ndáá wε.” Yesue anláá mó aá, “Tǎgén ábém bán bé rídyəŋ ní mbód.” ¹⁶ Yesue ansēded

mó ngen éche élonθένé έβε αά, “A-Simōn, mwān a Jōn, edəə me-ye?” Petro antimtén mó αά, “Έε, a-Sāj, ebíi wě ndəə we.” Yesue anláá mó αά, “Tōgén nímēm rídyōŋ mí mbód.” ¹⁷ Yesue asedéd mó ngen échě élonθένé éláán αά, “A-Simōn, Mwān é Jōn edəə me-ye?” Yāl enhós Petro áte áde Yesue ásédte mó ngen échě élonθένé éláán aáken, “Edəə me-ye?” Né-óó, anláá Yesue αά, “A-Sāj, ebíi mam mésyāāl. Ebíi wée ndəə we.” Yesue anláá mó αά “Tōgén nímēm rídyōŋ mí mbód. ¹⁸ Ne mbále, nlāŋge we nén meé, áde ébedé etum, mmōn epúdé’áá abad, ékäg-ke kéhée wée édáá. Boŋ áde wéchunné wēsād mekáá, mod ampée awáád we abad, ákēēn-ne we wée wéedəə’é akε.” ¹⁹ (Yesue anhób nê álúmed nyaa e kwééd echě Petro áwēē, álúmed ehúmé é Dyōb.) Ambid e nê dōó Yesue álāŋgeé mó αά, “Hídé me.”

Yesue ne mbapee awě ddáá

²⁰ Dōó Petro ánóné ámbid boŋ ányīnē’ née mbapee ampée áhídeé bó. Ane mbapee abédée mbapee awě Yesue ándəŋgé. Mōó andyee Yesue á akéb á pónde éche bedyágé’áá ndyééd ngukél, boŋ ásēdēd Yesue αá ken, nzé-módé āsōm mó. ²¹ Anyín áde Petro ányíne’-áá mó, anhób αά, “A-Sāj, chán-náa anén mod?” ²² Yesue ankwentén mó αά, “Nzé nhede meé ábê á alongé káōŋne pónde echě mépeé, chán nê ánóné we? Hídé me.” ²³ Né-óó, énkānléd átíntē e bad ábe behídé’áá Yesue hōm ásyāāl nén bán ane mbapee éewáá, kénéε Yesue énkēnhóbpé αá, éewáá. Anhób dāsō αά, “Nzé nhede meé ábê á alongé káōŋne pónde echě mépeé, chán nê ánóné we?”

24 Ane mbapεε mó abíde mbónj áyāl e nímén mekan, mó-'aá atelé mó ásē. Debíí-'ε bán, kéchéé echě áhóbé édé mbále.

Asóg á kálag echě Jōne

25 Ekud é mam émpēe édé éche Yesuε ábélé. Nzé bénhōb bán bétele' mésyāāl ásē, ahóg ámbid e ádíńí, nwémtan mεé né nkōjsé méekwogké échē kálag ahé áte.

lxxx

Mel̥ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48